

PABOJA ETEHUE'YO CONITOJO BA'E CUANA HUASIJJE EBIONEI 1 CORINTIOS

Pabohua tehue canaje Jesosaja epeejji cuana Conitojo ba'e yasijje

¹ Jesosaja epeejji cuana, eya Pabo, Jesosa Quitoja huoojea'yo ojaya esohui huohuijji. Jamaya Eyacuiñajjiya a sa acani. Jesosaja epeejji Sotene enijje nequi. ² Eyaya tehueña miquiana huasijje, Jesosaja epeejji cuana Conito cuiñajijo ba'eca huasijje, ojjaña meshijo ba'eca huasijje pea'ai tehueña. E'e, yahuajo Eyacuiñajjiya miquianaya ojjaña babaca canaje Jesosaja epeejji e'e jojo nei epo'yojji, quea pame nee. Jamajjeya miquianaya ojjaña cuana jama poani ba'a: —Jesosa, je jaahuanajji pocue! —jamaya poani esejaya Emeshi Mese nei Jesosa Quito nijje, ojjaña esejaya Emeshi Mese nei nijje. ³ ¡Esejaya Emeshi Mese nei Jesosa Quitohua, Eyacuiñajjiya esejaya Chiiya pea'ai miquianaya cajaahuana cahua, quea bei caba'e mee cahua pea'ai!

Pabohua Eyacuiñajji bihuia canaje

⁴ Eya Eyacuiñajji nijje mimiani miquianajo quea huiso nee jama ba'a: —Eyacuiñajji, miya quea pame nee nee. Jesosa Quitoja epeejji ojjaña cuana jaahuanaña quea pame nee nee —eya poani.

⁵ E'e epeejji cuana, miquianaya Jesosa Quitoja epeejji poanijo, ohuaya miquianaya quea pame nee ameesahua cani tii, quea huiso nee.

Jamajjeya miquianaya ojaya ejjashahuabaquijji ba meesahua canaje quea ja'a nee. Ojaya esohui ba meesahua canaje, huohui meesahua canaje pea'ai. ⁶ Esohui quea pame nee Jesosa Quitoja eyaya miquianaya huohui huicha'a huicha'anaje yahuajo. Jamajjeya ojaya esohui jayojja jama miquianaaya atiitiiaña. ⁷ Jamajjeya esejaya Emeshi Mese nei Jesosa Quitoja epoe o'oyajjijo ishoañajo, o jayojjaya jama Edojjoshahua Pameya miquianaya ameesahua cani quea huiso. ⁸ E'e, Edojjoshahua Pameya miquianaya Jesosa jayojja jama amee canijo, Jesosa nijje jjapeequi pajea'yo aija. Jamajjeya esejaya Emeshi Mese nei poe o'oyajo, Eyacuiñajjiya miquianaya ba caje mimishi'ama. ⁹ E'e, Eyacuiñajjiya miquianaya babaca canaje ojaya Ebacula Ejja nijje, Jesosa Quito nijje ejjapeequijji tii, esejaya Emeshi Mese nei nijje. Eyacuiñajjiya ojaya esohui jayojja jama acaje'yo nei nei, e'e jojo nei; miquianaya Jesosaja epeejji quea ca'a nee po mee caje'yo tii tii.

Ojaya epeejji cuana ojee cajapeequi'yahua Jesosa nijje

¹⁰⁻¹¹ Ecuea epeejji cuana, Jesosa Quitoja epeejji Coeja huapa pojjeama poeyanaje e que. Enijje miminaje miquianajo jama ba'a: —Pabo, Jesosa Quitoja epeejji cuana Conitojo ba'e jjamimicuia-jea nobiajeaquiani quea huiso nee —poanaje.

Epeejji cuana, ¿apiojji acuae nequiana jjamimicuiajea nobiajeaquiani so'o? Jamaya miquianaya quea tai poani.

Jamajjeya ¡shajja'ajjacue mo! Esejaya Emeshi Mese neiya Jesosa Quitohua eya huoojea

canaje ojaya esohui huohuiya. Jamajjeya eyaya miquianaya huohuaña jama ba'a: Ojjaña miquianaya Jesosa Quitoja epeejji poanijo ¡oijaña ojaya ejjashahuabaquijji jayojja jama jjashahuabaquicue! ¡A'a jjamimicuiajea nobiajeaquijji! ¡A'a peapea ejjashahuabaquijji aiji! E'e, ¡ojee jjapeequicue quea bei nee Jesosa nijje! ¹² Miquianaya aje oe beca cuana jama poani ba'a: —Eya ca iña Pabo shajja'ajjajji poani.

Pea ca jama poani ba'a: —Eya ca iña Apono shajja'ajjajji.

Pea ca jama poani ba'a: —Eya ca iña Peno shajja'ajjajji.

Pea ca jama poani ba'a: —Eya ca iña Jesosa Quito shajja'ajjajji poani —nequiana poani, de.

¹³ ¿Apiojji acuae nequiana jamaya jjamimicuiajea nobiajeaquime poani so'o? ¿A'a Jesosa ojjaña mimishi cuijea'yojji pojjeama? ¿A'a ojjaña jaahuanajji pojjeama? E'e, oya ojjaña ojaya epeejji cuanaja mimishi cuijea'yojji, ese jaahuanajji oe nei poani tii tii. Eya pojjeama miquianaja mimishijo manoje'yo. Jesosa Quito ca ca oe miquianajo mano'yonaje acui ecueata'apeejo miquianajaya mimishi cuijea'yojji. Onaaya miquianaya besa mee canaje Jesosa nijje jjapeequianijo, enijje jjapeequianijo pojjeama. ¹⁴ Jamajjeya eya, Pabo quea bihui poani ecuea miquianaya besa mee jjimajo. Jesosaja epeejji cuana oe pojji eyaya besa meenaje Quipo, Mayo pea'ai. ¹⁵ E'e, eyaya oe pojji besa meenajejo, ejjamimicuiajea nobiajeaquijji pojjeama pea cuana nijje jama ba'a: —Pabohua ecuana besa mee canaje o shajja'ajjajji epoji —e'ajji pojjeama.

E'e, eyaya miquianaya besa meenaje ecuea epeeiji epojji pojjeama.

¹⁶ E'e pojja'a eyaya Etepana, ojaya huapa pojjeama cuana pea'ai besa meenaje. Oe pojji pea cuana besa meenaje pea'ai pojja'a. Cua'a de, pajea'yonaje eyaya. ¹⁷ Jesosa Quitoja eya huoojea jjima ojaya epeeiji cuana besa meeya. Chojja, ohuaya eya huoojea canaje ojaya esohui quea pame nee huohuiya jama ba'a: —Ecuea esohui quea pame nee huohuañajo, ieya acui ecueata'apeejo mano'yonajejo oe huohuicue! ¡A'a dejjaja ejjashahuabaquijji jayojja jama huohuijji, ma ojaya ejjashahuabaquijji quea ja'a poso acanija! Jamaya ehuohui'yo jojjemo, miya quea sohui ja'a jojjemo ojjaña mi bihuiajji pome. Jamajjeya jamaya ehuohui jojjemo Eyacuiñajji bihuiia jjima acame. “Jesosa Quito acui ecueata'apeejo mano'yonaje ecuanaja mimishi cuijea'yoji” ajjima acame onaaya —jamaya Jesosaa eya huohui cani.

*Eyacuiñajji ejjashahuabaquijji esejaya
ejjashahuabaquijji jayojja jama pojjeama*

¹⁸ Eyacuiñajji esohui quea pame nee Jesosaja, oya mano'yonaje esejaya mimishijo shajja'ajja majje shajjama' cuana jama poanaje ba'a: —Cajaa Jesosaja esohui, ma oya ojjaña mimishi cuijea'yoji poani; acui ecueata'apeejo mano'yonaje cajaa pea'ai —poanaje. Maya Eyacuiñajjiya quijje quea nee nee po mee caje'yo.

Eseya, Jesosaja epeeiji cuana ca ca Eyacuiñajjiya ba'e tiitii mee caje'yo. E'e, oja sohui shajja'ajja majje eseaya jama poani ba'a: —Eyacuiñajji quea

ca'a nee neeya eseya ba'e tiitii mee caje'yo onijje; oja Bacua Ejja Jesosa acui ecueata'apeejo mano'yonaje esejaya mimishi cuijea'yoiji –poani.

19 E'e, yahuajo nei Eyacuiñajjiya Isaia tehue mee ca poa jama ba'a:

“Beca cuana jama poani ba'a: —Ecuea eba ojjaña —poani. O shajja'ajjajji poaniya pea'ai jama acani ba'a: —E'e de, jojjaña ojaya eba! —poso acani. Ojjaña ojaya eba poso acani. Eyaya ca ca ojjaña cuana ba meeje ojaya eba oe pojji nei”.

Jamaya Eyacuiñajjiya yahuajo nei Isaia tehue mee ca poa.

20 E'e, Eyacuiñajji ese jayojja jama jjashahuabaqui ajja. Ojjaña ba epo poso ohuaya ba cani quea sapa ca'a. E'e, dejja quea huiso esohui bajji, esohui huohuijji cuana, joya dejja cuanaja ejjashahuabaquijjijo mimicuiajeanobiajea cani pea'ai quea huiso ba epo poso Eyacuiñajjiya esohuijo Jesosajo jjabahuejjaqui mee ajja jama ba'a: Eyacuiñajjiya eseya ba cani emimishi cuijea'yo Jesosa nijje jjapeequianijo ma dejja cuanajaya ba jjima. Yajja jjabahuejjaqui meeme yajji, quea huiso ba epo poso oya jjabaquiani.

21 Eyacuiñajjiya ejjashahuabaquijji quea ja'a poanijo ohuaya eseya ba'e tiitii mee caje onijje, Jesosa nijje jjapeequianijo, ojaya esohui shajja'ajja poquiañajo pea'ai. Ohuaya eya esohui quea pame nee Jesosajo huohui mee canaje. Jamatii ojjaña quea jjashahuabaqui quehua jama poani ba'a: —¿Yajja yajji joya miquianaaya huohuiaña Jesosa mano'yonaje esejo, esejaya

mimishi cuijea'yojji? Quea jjashahuabaqui quehua miya poani, de —jamaya Jesosaja epeeiji pojjeama poani.

²² E'e de, ecuana Jodio cuaa jama acani ba'a: —¡Eyacuiñajjiya jayojja acue, ma dejjaajjima acani! Majoya ecuaaya miya baje e'e jojo nei Ñyacuiñajjiya huoojea'yo ojaya esohui huohuijji —jamaya quea tai poani Jodio cuana.

—¡Esohui huohuijji quea huioso ba epo jayojja jama mimicue! Jamajjeya ecuaaya miya baje Ñyacuiñajjiya huoojea'yo esohui huohuijji —jamaya quea tai poani Jodio pojjeama cuana.

²³ Ecuanaya ca ca jama poani ba'a: —Jesosa Quito Eyacuiñajjiya huoojea'yo ojjaña jaahuanajji acui ecueata'apeejo mano'yonaje eseja mimishi cuijea'yojji.

Jesosa Quitoja esohui shajja'ajja sa po ajja jjejojo Jodio cuana quea quene poani, poquiquehuani tii onijje jjapeequi ajja jjejojo. Jodio pojjeama cuaa pea'ai esohui cajaa acani: —Chojja Pabo, miyaya esohui quea ja'a pojjeama huohuiña —jama siajje pomeya onaya poani.

²⁴ Jamatii Eyacuiñajjiya Jodio cuana, Jodio pojjeama cuana pea'ai babaca canaje Jesosa Quitoja epeeiji nei epo'yojji. Esejaya, Jesosa Quitoja epeeiji cuanaja eba Jesosa Quitoja esohui quea pame nee. E'e, Eyacuiñajjiya Jesosa huoojea canaje mimishi cuijea'yojji. Jamajjeya esejaya eba Ñyacuiñajji quea ca'a nee nee, ojjaña ojaya eba. ²⁵ E'e, Eyacuiñajji quea jjashahuabaqui ja'a nee nee. Ojjaña nei nei ojaya eba. Oya quea ca'a nee nee; pea chama'o jayojja. Jamajjeya ohuaya eseaya ba'e tiitii mee caje'yo Jesosa Quito acui ecueata'apeejo

esejaya mimishijo mano'yonajejo. Jamatii Jesusaja epeeiji pojjeama aje oe jama poani ba'a: — ¿Yajja poajo acuae Eyacuiñajjiya ecuanaja mimishi cuijea ca'yome Jesosa mano'ya poajo? Chojja — acani quea quehua jjashahuabaquiani jjejojo.

Eyacuiñajjiya eseya babaca canaje ojaya epeeiji epoiji jamatii onajaya eseya boti'ama

²⁶ Epeeiji cuana, jjashahuabaquicue! Eyacuiñajjiya miquianaya Jesosa nijje jjapeequi meesahua jjimajo, ¿achajja miquianaya poanaje? Beshahua nei esohui ba po jjima. Beshahua nei ona huoojea po jjima, emeshi mese cuanaja bacua po jjima pea'ai miquianaya poanaje. ²⁷ Jamatii Jesosaja epeeiji pojjeamaa jama acani ba'a: —Jesosaja epeeiji quea pame pojjeama. Oya cuana quea jjashahuabaqui ja'a pojjeama —jama posoya acani Jesosaja epeeiji pojjeama cuaa.

Eyacuiñajjiya ca ca eseya babaca canaje ojaya epeeiji epoiji, quea huiso esohui ba epo ona quea bicho po meeiji. Eyacuiñajji jama poani ba'a: —Jesosaja epeeiji pojjeama quea pame pojjeama jjashahuabaquiani —jamaya Eyacuiñajji poani.

²⁸ E'e, Jesosaja epeeiji pojjeamaa eseya niñe ba cani jama ba'a: —Jesosaja epeeiji cuana ona huoojeajji jayojja pojjeama, esohui ba po jjima jayojja pea'ai, aema' pea'ai. ¿Ajeo oya cuana esha-jja'ajjaji? —poani.

Jamatii Eyacuiñajjiya eseya iyaa ca poa ojaya ebabaca. Jamajjeya ohuaya onaya ba mee caje jama ba'a: —Miya ojjaña ba epo poso poanijo, miquianajaya ejjashahuabaquijji quea tai.

Miquianaya quea tame pojjeama. ¡Quea bicho pocue! —Eyacuiñajjiya acani.

²⁹ Jamajjeya ae pishana Eyacuiñajji nijje mimije jama ba'a: —Eyacuiñajji, ¡bacue! Eya ca ca iña jamatii quea tame nee —jamaya emimiji pojjeama miya Eyacuiñajji nijje.

Quijje pea'ai ojjaña Eyacuiñajji cojja nei nequi majje quea bicho, quea mete poaje. ³⁰ Jamatii Eyacuiñajjiya eseya Jesosa Quito nijje jjapeequi meesahua ca'yonaje. Ojaya epeejji poanijo, ojaya ejashahuabaquijji ba meesahua cani. Ojaya esohui jayojja jama ba'e meesahua cani. Mimishi cuijea'yo majje quea boejea po mee cani. Eseya ba'e tii tii mee caje'yo onijje, Eyacuiñajjiya. ³¹ Yahuajo nei Eyacuiñajjiya esohui etehue'yo jama poa ba'a: “Jamajjeya ¡esejaya Emeshi Mese nei bihuiacue!

Oya oe nei quea tame nee. A'a jama pojji ba'a: —Eya ca ca iña jamatii quea tame nee”.

Jamaya Eyacuiñajjiya esohui etehue'yo poa.

2

Jesosa Quito acui ecueata'apeejo mano'yonaje

¹ Ecuea epeejji cuana, yahuajo miquiana que poe jeahuaa eyaya esohui quea tame Jesosajo huohuinaje. Eya jama po jjima ba'a: —Eya ohueya dejja ojjaña esohui ba epo nei nei. Ecuea emimi quea ja'a. ¡Jamajjeya shajja'ajjacue mo! —jamaya ajjima ecuea.

Chojja, miquiana que poe majje eyaya Eyacuiñajjiya esohui e'e nei Jesosa Quitojo huohuinaje, ma onajaya yahuajo ba jjima poa. ² Miquiana que poe jjimahua eya

jjashahuabaquinaje jama ba'a: —Eyaya Conitojo ba'e cuana huohuije esohui quea tame nee Jesosa Quitojo, ma acui ecueata'a peejo mano'yonaje esejaya mimishi cuijea'yojji. Pea esohui huohui jjima aje.

³ Miquiana que poe majje eya jjashahuaba neineiquinaje jama ba'a: —¿A'a eyaya Eyacuiñajija esohui huohuije quea ja'a nee pojja'a? —eya quea mete poanaje.

⁴ Jamajjeya Edojjoshahua Pame quea ca'a neeya eya huohui meesahua canaje esohui e'e nei miquianajaya eshajja'ajjajji. Esohui huohuiji ojjaña ba epohua jayojja jama ecuea huohui jjima.

⁵ Jamajjeya Eyacuiñajjiya miquianaya Jesosa Quito nijje jjapeequi meesahua canajejo, ojaya epeejji nei poanaje. Dejja ojjaña esohui ba epohua jama ecuea huohui jjima.

Eyacuiñajija ejjashahuabaquijji e'e jojo nei quea ja'a nee

⁶ Jamatii Jesosaja epeejji eyacua pojjeama eyaya huohuaña; etii jayojja eyaya huohuaña esohui quea ja'a nee, Eyacuiñajija ejjashahuabaquijji. Jesosaja epeejji pojjeamaja esohui jayojja jama pojjeama, emeshi mese cuanaja esohui jayojja jama pojjeama eyaya esohui huohuaña, eshahuaja esohui jayojja jama pojjeama pea'ai. Maya quijke ojjaña ca'a'ama poaje. Eyacuiñajjiya oya cuana ona huoojeajji popajea mee caje'yo.

⁷ E'e, ojjaña nei nei Eyacuiñajija eba. Eyaya Eyacuiñajija ejjashahuabaquijji quea ja'a nee Jesosa Quitojo huohuaña. Yahuajo maya ejjashahuabaquijji ba mee jjima ojjaña,

Eyacuiñajjija. Jjeya ca ca ohuaya eseya, ojaya ehuoojea'yo cuana ba mee canaje jama ba'a: Meshi pana jjimahuajo tii Eyacuiñajjija eseya babaca ca poa Jesosaja epeejji cuana epo'yojjii, onijje eba'e tiitii'yojjii. Jesosa Quitohua mano'yo majje oja epeejji cuana ba'e tiitii mee caje'yo quea pame nee onijje. Jamaya Eyacuiñajjija jjashahuabaquia poa. ⁸ Maya Jodio pojjeamaja emeshi meseja ba jjima poa; Jodio etii cuanaja ba jjima pea'ai poa. Maya onajaya eba jojjemo Emeshi Mese nei quea ca'a Jesosa Quito bajjani acui ecueata'a peejo mano mee'yo jjima aca quiaye. ⁹ Jamatii Eyacuiñajjija yahuajo nei esohui tehue mee ca poa jama ba'a:

“Oya esejaya quea jea neejo, Eyacuiñajjija eseya quea pame nee acaje'yo, ojjaña ojaya epeejji cuana. Maya esejaya ba jjima ecojjaja, maya esejaya shajja'ajja jjima eshajjaja, huohui jjima pea'ai. Maya eseya jjashahuabaqui jjima pea'ai. Eseya ohuaya quea pame nee nee acaje'yo”.

Yahuajo nei jamaya tehue mee ca poa. ¹⁰ Maya Edojjoshahua Pameya eseya ba mee cani: Eyacuiñajjija quea pame nee acani esejo, ma Jesosa Quitohua ojaya epeejji cuana ba'e tiitii mee caje'yo onijje eyajo.

Ojjaña Edojjoshahua Pameja eba. Jamajjeya ese que dobiqui majje ohuaya eseya ba mee cani Eyacuiñajjija ejjashahuabaquijji. ¹¹ ¿Ajea eba oe dejjaja ejjashahuabaquijji? Ojaya eba ojaye nei ojaya ejjashahuabaquijji, onajaya ba jjima. Oya jayojjaya Edojjoshahua Pameja eba Eyacuiñajjija ejjashahuabaquijji, ojaye neija. Eyacuiñajjija es-

eya ba'e tiitii mee caje'yo Jesosa nijje jjapeequianijo ojaya eba nei. ¹² E'e, eseya Jesosaja epeeiji poanijo shajjama' jayojja jama jjashahuabaqui ajja. Jamajjeya Eyacuiñajjiya Edojjoshahua Pame ese que dobiqui mee canaje. Ohuaya eseya ba mee canaje jama ba'a: Jesosaja epeeiji poanijo ca ca oe Eyacuiñajjiya eseya ba'e tiitii mee caje'yo onijje, eseya ojaya quea jea neejo. Quea pame nee nee eseya acaje'yo pea'ai ohuaya. ¹³ Jamajjeya Jesosaja epeeiji pojjeamaja esohui jayojja jama esejaya ehuohuijji pojjeama. Chojja, Edojjoshahua Pameya eseya huohui meesahua cani ojaya ejjashahuabaquijji quea ja'a Jesosaja epeeiji nei cuana huasijke.

¹⁴ Jamatii Jesosaja epeeiji pojjeamaja ba jjima Edojjoshahua Pame. Ba meemee ajja Edojjoshahua Pameja ejjashahuabaquijji, quea quehua nee ojaya. Jamajjeya jama poani ba'a: —¿Apiojji Jesosa nijje ejjapeequijji? Maya ecuanajaya esohui quea quehua —jamaya poani.

E'e, ojaya jamatii ebajji pojjeama Jesosa Quitoja esohui. Maya Edojjoshahua Pameya eseya ba mee cani. ¹⁵ Eseyá ca ca Jesosaja epeeiji poani. Edojjoshahua Pameya ese que dobiqui majje ba mee cani ojjaña eba'ejji quea pame; eba'ejji quea mimishi pea'ai ba mee cani jama ba'a: —E'e, jamaya. ¡Quea pame nee acue! —amee cani—. Pea'ai quea tai jjashahuabaquianijo, ohuaya jama amee cani ba'a: —Chojja, jamaya quea tai, Eyacuiñajjiya boti'ama —ameesahua cani pea'ai ojjaña quea ja'a eba'ejji.

Maya onajaya quea quehua nee nee. Jamajjeya Jesosaja epeeiji pojjeamaja ojaya epeeiji eniñebajji

pojjeama jama ba'a: —¿Apiojji miquianaya jama ba'yani? ¿Apiojji ma esohui shajja'ajjaña, huohuaña pea'ai? —jamaya e'ajji pojjeama onajaya.

¹⁶ E'e, yahuajo Eyacuiñajjija esohui etehue'yo jama poa ba'a:

“Ojjaña Eyacuiñajjija ejjashahuabaquijji ¿ajea eba? Chama!. ¿A'a eseyaya Eyacuiñajji ba meesahua je? Chojja”.

Jamaya yahuajo nei poa.

Jamatii Jesosa nijje jjapeequianijo, Edojjoshahua Pameya eseya Eyacuiñajjija ejjashahuabaquijji ba meesahua cani.

3

Pabohua Jesosaja epeejji jjabahuejjaqui mee cani

¹ Ecuea epeejji cuana, miquianaya ebacua esho'i jayojja jama poani, quea jjashahuabaqui ja'a pojjeama poani tii tii. E'e, yahuajo miquiana nijje nequiya eyaya Jesosa Quitoja huohuinaje. Matii beshahua nei miquianaya jjashajja'ajjaqui ajja. Jesosa nijje jjapee neineiqui jjima jayojja jama poani; ojaya epeejji pojjeama jama poani. ² Jiquio ecua ebacua esho'i tojjo ba'e noe quia jjima acani jayojja jama ecuea miquianaya huohui jjima esohui quea ja'a nee quea camaja ebajji. Jjeya pea'ai miquianaya Jesosaja epeejji etii jayojja jama pojjeamajo ma esohuijo jjashajja'ajjaqui ajja. ³ Miquianaaya aje oe Jesosaja epeejji pojjeamaa jayojja tiiya aña. E'e, Jesosaja pea epeejji cuanaja esohui shajja'ajja sa po'yo ajja. Jjamimicuajea nobiajeaquiani. Jamaya poanijo miquianaya Jesosaja epeejji quea

ja'a pojjeama. Ojaya epeejji pojjeama jama poani, de.⁴ E'e, miquianaya aje oe jama poani ba'a: —Eya ca iñña Pabo shajja'ajjajji poani.

Beca ca jama poani ba'a: —Eya ca ca Apono shajja'ajjajji.

Jamaya poanijo Jesosaja epeejji quea ja'a nee jama jjashahuabaqui ajja miquianaya, de.

Ecuana Apono nijje Jesosaa huoojea ca'yonaje ojaya esohui huohuijji epojji

⁵ Eya, Pabo Apono jayojja Jesosaja esohui huohuijji. Ohuaya ecuana huoojea ca'yonaje ojaya esohui huohuiya. Jamajjeya miquianaya Jesosa nijje jjapeequi'yonaje ecuanaja esohui shajja'ajja majje. E'e, Eyacuiñajjiya ojjaña ecuana chaco mee cani. Ojaya esohui jama poani eya. Ojaya esohui jayojja jama acani Aponohua pea'ai.

⁶ Eyaya Eyacuiñajjiya esohui huohui coonaje miquiana huasijke. Aponohua ma esohui huohui ca o'oyanaje. Eyacuiñajjiya ca ca oe miquianaya ojaya esohui ba meesahua ca'yonaje. E'e, jiquio ecua acui sisi banajjiya bana cani jayojja jama eyaya, Pabohua Eyacuiñajjiya esohui huohui coonaje miquiana huasijke. Echacojjiya acui sisi ebana'yo enaa sha cani jayojja jama Aponohua esohui huohui ca o'oyanaje miquianajaya eshajja'ajjajji. ⁷ Esohui huohui cooijiya, esohui huohui o'oyajjiya pea'aiya ishoa'ajja cani esohui huohui majje. Eyacuiñajjiya ohuaye nei ojaya esohui ba meesahua cani. E'e, jiquio ecua acui sisi banajjiya, acui sisi shajjiya pea'ai chaco majje ishoa'ajja cani a'a acui tiiye'yo ebajji jayojja jama Eyacuiñajjiya ohuaye nei acui sisi jayojja tii mee

cani. ⁸ Ebanajji epo acui sisi shajji jayojja jama jjashahuabaquiani jama ba'a: —Eya quea pame nee chaco majje, e'acui yiye meseya eya sosequia caje —jjashahuabaquiani cuana.

E'e jojo nei e'acui yiye meseya jamaya acaje'yo. ⁹ Miquianaya Eyacuiñajjiya acui yiye jayojja. E'acui yiye mese jamaa Eyacuiñajjiya miquianaya quea pame nee jaahuana cani. Jiquio ecua acui yiye chacojji jamaya ecuanaya Apono nijje Eyacuiñajjiya echacojji poani; miquiana que ojaya esohui huohuiaña.

Jesosaja epereeji cuana Eyacuiñajjiya equi jayojja

Jiquio ecua e'equi meseya oja equi jaahuana cani jayojja jama Eyacuiñajjiya miquianaya jaahuana cani, ojjaña. ¹⁰ Eyacuiñajjiya Jesosa Quito equi yamajjana quea ca'a nee jayojja jama nequi mee cani. Ecuana Apono nijje Eyacuiñajjiya equi iyajji jayojja jama poani. Jiquio ecua echacojjiya equi iya cani eyamajjana nequia majje equi e'oquejji pojjeama jayojja jama ecuanaaya Jesosaja esohui huohuiaña, miquianaya nahueña pea'ai Jesosa nijje ejjapeequi meesahuajji, quea nee nee epoiji pojjeama cuaquijo. Eyacuiñajjiya eya huoojea majje quea ca'a po mee canaje ojaya esohui pea cuana huasijke ehuohui coojji. Jamajjeya eya equi yamajjana nequiajji jayojja poanaje. Jjeya pea cuaa miquianaya esohui huohui cani e chamajo. Oya equi iyajeyojji jayojja jama poani. ¡Miquiana quea ja'a nee nee casohuihuohui cahua!

¹¹ Yahuajo Eyacuiñajjiya Jesosa Quito jiquio meshi cuana huasijke huoojea majje eseaya hu-

hui canaje jama ba'a: —¡A'a pea nijje jjapeequijji!
¡Ecuea Ebacua Ejja oe neija esohui shajja'ajjacue!
—acanaje.

Equi iyajjiya eyamajjana quea ca'a nequia cani jayojja jama equi nequi tiitii mee'yojji jayojja jama Eyacuiñajjiya oja Bacua oe nei huoojea canaje ese ba'e tiitii meeya. ¡Oya oe shajja'ajjacue! ¹² E'e, esohui huohuijji cuana equi iyajji jayojja. Beca equi iyajjiya equi quea ca'a nee iya cani. Iya cani mei huo'o, mei oshe quea siyo, mei copo quea siyo nee nee pojja'a. Pea cuaa equi iya cani ca'a'ama; acui equi, bequiobo iña, huenihueni equi pojja'a. Jamaya esohui huohuijji quea hueaa acani. ¹³ Quijje cuaqui poeyajo, equi quiyo'yajo, ojjañaa ba caje ache equi iyajji quea pameya equi quea ca'a nee iya canaje, ache equi iyajji quea hueaa equi ca'a'ama iya canaje pea'ai. Oya jayojjaya Jesosa Quitohua poe o'oya majje huohui caje jama ba'a: —Ma esohui huohuijji quea pameya esohui e'e nei huohui canaje. Jamajjeya o shajja'ajjajji cuana enijje jjapeequi pajea jjima acaje. Maya esohui huohuijji quea huea poanaje; quea tai esohui huohui canajejo, o shajja'ajjajji cuana enijje jjapeequi pajea'yonaje.

¹⁴ Jiquio ecua cuaqui poeyajo, equi iyajji quea ja'aja equi nequije quea ca'a jayojja jama Jesosa poe o'oyajo, esohui huohuijji quea ja'a nee Eyacuiñajjiya sosequia caje quea pame nee, oja chaco quea pame sosejje. ¹⁵ Equi iyajji quea hueaja ca ca oja equi quiyo jeyojeyoje'yo cuaqui poe'yajo jayojja jama poaje esohui huohuijji quea huea, Jesosa poe o'oyajo. Eyacuiñajjiya oya cuana esosequiajji pojjeama. Jamatii equi jiji'yajo dejja cuaya-

jeaquinanani equiyo'yo poajejje jayojja jama oya cuana cuaquijo quiyo'yo ajja poaje'yo, beshhua nei.

Miquianaaya Eyacuiñajjija equi ja'a quea mimishi aji!

¹⁶ Ecuea epeeiji cuana Conitojo ba'e, ja'a pajea'yoji eseya Eyacuiñajjija equi jayojja! Edojjosahua Pame nei ese que dobiquinaje Jesosaja epeeiji poanijo. Oya miquiana nijje anijo, miquianaya Eyacuiñajjija equi jayojja poanaje. ¹⁷ Eyacuiñajjija ojaya equi quea nahue nee: —Ecuea equi quea pame nee, jehue'ama. Miquianaya ecuea equi jayojja poanaje. Jamajjeya ecuea equi, miquea eyami, nahue ajjajo, quea mimishi poanijo eyaya miquianaya tecueaje —ohuaya acanaje.

¡Eyacuiñajjija ejjashahuabaquiji quea ja'a bacue, dejaja pojjeama!

¹⁸ Ecuea epeeiji cuana, ja'a quea jjashahuabaqui quehua pojji! Miquianaya beca cuana jama poani ba'a: —Ecuana quea jjashahuabaqui ja'a poani, dejja ojjaña ba epo jayojja jama poani.

Chojja. ijashahuabaquicue jama ba'a: — Eyacuiñajji, ecuea eba oe pojji nei. ¡Eya ba meesahuacue miquea ejjashahuabaquiji quea ja'a nee! —jamaya oya acue!

¹⁹ Jesosaja epeeiji pojjeama quea huiso jamaya jjashahuabaquiani ba'a: —Ojjaña ecuanaja eba quea ja'a nee nee.

Eyacuiñajjiya ca ca onajaya ejjashahuabaquijiyo jama poani ba'a: —Oya cuana quea quehua

jjashahuabaquiani, quea ja'a pojjeama, cajaa — oya poani.

E'e, Eyacuiñajjija esohui etehue'yo yahuajo nei jama poa ba'a:

“Quea huiso jiquio meshi cuanajo ba'e jjashahuaba taiquiani jama ba'a: — Ecuana ja ejjashahuabaquijji quea ja'a nee poani —poso oya poani. Chojja, oya cuana jjadasiaquijji poanijo, eyaya oya jjadasiaqui pajea meeje'yo”.

Jamaya aca poa Eyacuiñajjija oja sohui etehue'yojo.

²⁰ Eyacuiñajjija pea esohui yahuajo nei etehue'yo jama poa ba'a:

“Eya oe nei quea jjashahuabaqui ja'a; jjadasia meequei ajja pea'ai. Dejja cuana chojja, ojjañaja ejjashahuabaquijji quea ja'a pojjeama”.

Jamaya yahuajo nei nei tehue mee ca poa.

²¹ Jamajjeya ja'a jama pojji ba'a: —Ma esohui huohuijjija ejjashahuabaquijji quea ja'a nee. Oya cajjashahuabaquiahua —a'a pojji!

¡Bacue! Jesosa Quito miquea Emeshe Mese nei. Ohuaya ojjaña esohui huohuijji huoojea canaje miquiana onijje jjapeequi meesahuaa. ¡Jamajjeya shajja'ajjacue! ²² E'e, Eyacuiñajjija ojaya esohui huohuijji huoojea canaje miquiana huasi-jje. Ohuaya eya, Pabo ebionei huoojea canaje. Apono, Peno pea'ai huoojea canaje. Ohuaya ojjaña aquiana pana ca poa miquianajaya quea pame nee ejaahuanajji. Miya eshe ani ohuaya jaahuana cani; mano'yajo pea'ai jaahuana caje'yo quea pame nee. Ohuaya jjeyahua nei miquianaya

jaahuana cani. Quijje nei miquianaya jaahuana caje'yo tii tii pea'ai, Eyacuiñajjiya. E'e, Jesosaja epeeiji poanijo miquianaya e'aquiana mese jayojja jama poani. ²³ Eyacuiñajji Jesosa Quitoja Chii. Miquianaya Jesosa Quitoja epeeiji cuana. Jamajjeya ojjaña Eyacuiñajjiya aquiana quea pame nee miquianajaya poani.

4

jA'a Jesosaja huoojea'yo esohui huohuiji niñebajji!

¹ ¡Epreeiji cuana, ecuana shajja'ajjacue! Eyacuiñajjiya ecuana huoojea ca'yonaje esohui e'e nei Jesosa Quitoja huohuiya, ma yahuajo nei onajaya ba mee jjima poa. ² ¡Bacue! jiquio ecua echacoijiya o huoojeajji shajja'ajja cani jayojja jama ecuaaya aña. Jamajjeya ohua huoojea cajje ecuaaya Eyacuiñajjiya esohui huohuiaña, onajaya esohui pojjeama. Esohui quea pame nee Jesosa Quitoja ehuohui pajea'yoji pojjeama. ³ Jamajjeya ecuea miquianaya eshajja'ajjajji pojjeama ejo jama poani ba'a: —Pabohua quea ja'a nee huohui cani —poani—. Pabohua quea ja'a pojjeama huohui cani —miquiaa ajje, eyaya eshajja'ajjajji pojjeama pea'ai. Onaa jama ejo huohui cajje pea'ai eyaya eshajja'ajja'yoji pojjeama.

Eya pea'ai ecue huohuijo jjashahuabaqui ajja jama ba'a: —E'e pojja'a ecuea ehuohui quea ja'a nee; e'e pojja'a quea ja'a pishana —jamaya eya jjashahuabaqui ajja pea'ai.

⁴ E'e, eya jjashahuabaquiani jama ba'a: —Eyaya Jesosa Quitoja chacoaña quea pame nee.

E'e pojja'a. Eyacuiñajjiya ojaya ej-jashahuabaquijji ejo, eya chacoañajo cahuohui cahua quijje. ⁵ Jamajjeya ecuanaja ejjashahuabaquijji, ojjaña ecuaaya anaje pea'ai miquianajaya ba jjimajo, ja'a ecuanaya niñebajji! ¡Ishoa socue oe Jesosa Quitoja epoe o'oyajjijo! Majoya ohuaya, esejaya Emeshi Mese neiya ojjaña cuanaja ejjashahuabaquijji, ojjañaa quehuajje acanaje pea'ai ba mee caje. Ojjañaa shajja'ajja caje. Majoya eseya quea pame nee anajejo, Eyacuiñajji quea bihui nee poaje: —E'e, jamaya. Miya Jesosaja epeejji quea ja'a nee; quea pame nee ojo chaconaje —eseya acaje ohuaya.

jEsohui huohuijji cuana pea jayojjaya quea jea ameya acue!

⁶ E'e epeejji cuana, miquiana jjabahuejjaqui meeiji eyaya tehueaña Aponojo, ejo pea'ai. Eyacuiñajjiya esohui jama poa ba'a: “¡Oe epeejji quea boti, pea epeejji boti'ama a'a ajji!” Jamaya esohui etehue'yo poa.

Jamajjeya ja'a jama ajji ba'a: —Aponohua quea pame nee acani; Pabohua ca ca quea pame pis-hana acani —a'a pojji!

¡Ojjaña Jesosaja esohui huohuijji pea jayojjaya oe acue! Jamajjeya miquianaaya ma esohui etehue'yo jayojja jama e'e jojo nei aje. ⁷ E'e, Eyacuiñajjiya ojjaña Jesosaja epeejji pea jayojjaya ba cani. Ohuaya oe epeejji pea epeejji jayojjaya acani. Jamajjeya ja'a jjashahuabaquijji jama ba'a: —Eya ca iña quea pame nee. Pea cuana quea pame pis-hana —a'a jamaya jjashahuabaquijji!

Miquianaya ca mi ca oe Eyacuiñajija esohui jamatii ba epo poso poani. Chojja, ojaya esohui miquianajaya ebajji pojjeama jamatii. Eyacuiñajija esohui huohuijji miquiana huasijje esohui huohui mee majamaja canaje.⁸ Miquianaya ca mi ca oe jama poso jjabaquiani ba'a: —Ecuana ca ca oe Jesosaja esohui jayojja jama ba'yani quea pame nee —poso jjabaquiani quiana—. Quea huiso ecuanajaya eba —nequiana poani pea'ai—. Ecuana ca ca ona huoojea'yojji poani Eyacuiñajiji nijje. Pabo chojja, ona huoojeajji pojjeama —jamaya poso poani miquianaya.

Miquianaya Eyacuiñajiji nijje ona huoojea'yojji e'e jojo nei jojjemo miquianajo eya quea bihui nee pome. Jamaya e'e jojo nei jojjemo ecuana miquiana nijje ona huoojea'yojji pome pea'ai.

ijjashahuubaquicue ecuana quea nee poanaje miquiana sohui huohuijji!

⁹ Eyacuiñajija ecuana huoojea canaje ojaya esohui huohuiya. Jamatii ojaya eba ecuana shajja'ajja majje ojjañaa soadojo cani jama ba'a: —¿Apiojji shai oya cuana shajja'ajjaje so'o, de? ¡Cua'a, oya cuana quecuajeacue! Ojjaña oya cuana quea tai —jamaya onaya siajje poani.

Ecuana ca ca jjashahuabaquiani jama ba'a: —E'e de, ojjaña meshijo ba'eca cuaa ecuana soadojo cani, ojjaña eyajo aniya pea'ai.

¹⁰ E'e, Jesosa nijje jjapeequianijo, Jesosaja epeejji pojjeama cuaa ecuana niñepoqui poso acani. Miquianaya ca ca ojjaña ba epo poso acani cuaa. Jesosaja epeejji pojjeama cuaa ecuana ona huoojea'yojji jayojja jama pojjeama poso acani.

Miquianaya ca ca ona huoojea'yojji jayojja jama acani. Onaaya ecuana shajja'ajja jjima acani. Jamatii miquianaya shajja'ajja cani. ¹¹ E'e, jjeyahua nei ecuana Jesosa Quitojo mimianijo quea nee poani; ojjaña pojajajo quea shoe poani. Quea naba taja poani. Daqui chiichiani ecuanaja. Pea cuaa ecuana cuia cani Jesosa nijje jjapeequianijo. Ecuana poqui majamajani ojjaña cuiñajji yasijje quima' jayojja ecuana. ¹² E'e, ecuaaya bobijo janobajjima nei chacoaña. Pea cuana mimijajiyajo, ecuanaaya mimisaja'a jjima aña. Jama poani ba'a: —Eyacuiñajjiya miquianaya cajaahuana cahua —ecuaaya dejja quea tecue aña.

Jesosa nijje jjapeequianijo, pea cuaa ecuana napa cani. Jamatii quea quene po ajja. Jesosa nijje jjapeequi pajea'yo ajja pea'ai. ¹³ Pea cuaa niñeba cajje ecuaaya esohui quea beiya saja'aña. Jjeya pea'ai pea cuana ecuanajo quea tai mimiani jama ba'a: —Oya cuana Jesosaja epeejji cuana, cajaa. Shabo jama, caquishijehua —poani.

*jE jayojja jama pocue Jesosa nijje jjapeequianijo!
—Pabohua aca poa*

¹⁴ Ecuea epeejji cuana, eyaya jiquio esohui tehueaña miquiana quea yeno po meeiji pojjeama. Miquianaya ecuea ebacua jayojja jama poanijo, jjabahuejjaqui mee sa aña. ¹⁵ Esohui quea pame nee Jesosa Quitoja eyaya huohuinaje miquiana huasijke. Ecuea esohuijo miquianaya ojaya epeejji poanaje. Jamajjeya eya oe nei mique chii jayojja jama poanaje. E'e pojja'a Jesosa Quitoja sohuihuohuijji quea huiso nee poeje miquiana sohuihuohuiya. Sico meemee

ajja pojja'a, quea huiso nee nee. Jamatii eyaya ebionei miquiana huasijje esohui huohuinajejo miquianajaya chii jayojja poanaje. ¹⁶ ¡Jamajjeya ecuea esohui shajja'ajja socue! ¡E jayojja jama pocue!

¹⁷ Jamajjeya eyaya Jesosaja epeejji Timoteo huoojeaje miquiana quea pame ba'e meesahuaa. Timoteo ecuea quea jea nee, Jesosaja epeejji quea ja'a nee poani. Ecuea eba'ejjijo, ecuea esohui Jesosa Quitojo pea'ai ohuaya huohui caje o'oya miquianajaya epajea'yojji pojjeama, ma eyaya ojjaña Jesosaja epeejji cuana ojjaña cuiñajijo ba'e yasijje huohuiaña. ¹⁸ Miquianaya beca cuana shajjama' poani ojjaña miquea eba poso poanijo. Ecuea esohui shajja'ajja sa po'yo ajja. Jjashahuabiquiani jama ba'a: —Pabo poe ajja ecuana baa —poani.

¹⁹ E'e pojja'a Eyacuiñajjiya eya huoojea caje'yo Conito huasijje, miquiana huasijje quijje pishana. Shajjama' cuanaja esohui shajja'ajja maja sa po ajja eya. ¿A'a oya cuana Jesosa nijje jjapeequiani e'e jojo nei? ¿A'a Eyacuiñajjiya oya cuana ojaya esohui huohui meesahua cani quea ja'a nee? Maya eyaya ba sa aña. ²⁰ E'e, quea huiso esohui mimi majamaja majje e'e pojja'a jamatii Jesosaja epeejji pojjeama pojja'a nequiana. Jesosa nijje quea pame nee jjapeequianijo ca ca Eyacuiñajjiya eseya ba'e tiitii mee caje'yo onijje eyajo.

²¹ E'e, eya poeje'yo miquiana baa. Shajjama' poani tii, tecueajeaje'yo. Ecuea etehue'yo jayojja jama poanijo, eya quea bihui nee, quea bei nee poaje. Jamajjeya ¡ecuea esohui shajja'ajjacue, eya miquiana nijje quea bei epoji!

5

¡Jesosaja epeejji quea mimishi poani beibeiya tecueacue!

¹ Jesosaja epeejji Conitojo ba'eya eya huohui cañanaje jama ba'a: —Pabo, oe dejja Conitojo ba'eya oja shanase cojjo cani, Jesosaja epeejjiya, de —acanaje.

Jamaya quea tai nee nee. Eyacuiñajjija boti'ama nei nei. Jesosaja epeejji pojjeama jama po ajja, quea mete oya cuana. ² Jamatii miquianaya aje oe bicho'ama jjejojo jama poani ba'a: —Ecuanaya quea pame nee ba'e —nisho poani.

¡Oe epeejji quea mimishi nee poanijo, quea yeno pocue! Ma dejja oja mimishijo yeno'ama po jjimajo, ¡a'a onijje jjapeequijji! ¡Jesosaja epeejji cuana nijje a'a dobiqui meeiji!

—¡A'a ecuana nijje Eyacuiñajjija equi yasijje dobiquijji! Eyacuiñajjija miya eshajja'ajjajji pojjeama —oya acue.

³ Eya quea huesha nee yani; miquiana nijje nequi meemee ajja. Jamatii miquianajo jjashahuaba majamajaquiani tii. ¡Eya Jesosaja epeejji etii ojaya ehuoojea'yo poanijo, shajja'ajjacue mo! Ecuea ejjashahuabaquijji ma dejja quea mimishijo jama ba'a: —Oya quea mimishi poanijo, ¡quea bicho nee po meecue! —eyaya miquiana nijje nequiya jjemo jamaya huohuime.

⁴ Jamajjeya miquianaya Eyacuiñajjija equi yasijje ojee poe majje, Jesosa Quito esejaya Emeshi Mese nei miquiana nijje anije, miquiana quea jjashahuabaqui ja'a po meeiji ojaya esohui jayojja jama ameesahua caje. Eya pea'ai miquiana nijje

jjashahuabaquianijo miquiana nijje nequi jayojja poaje. ⁵ Jamajjeya ojee poe majje ñma dejja mimishi tecueacue jama ba'a: —ñEdosiquianaa mi huoojeajji poaniya miya canapa cahua! —jamaya acue oja mimishijo quea yeno epoji!

Quea yeno po majje oja mimishi pajea caje'yo. Manoje'yo pojja'a. Jamatii esejaya Emeshi Mese neiya Jesosaa poe o'oya majje ma dejja huoojea aija cuaquia yasijke, ca ohua mimishi pajea ca'yajo.

⁶ Dejja quea mimishi miquiana nijje jjapeequianijo, jamatii miquianaya bicho'ama poanaje. Jamaya quea tai. Miquianajaya eba jiquio esohui jama ba'a: “Oe pojji neiya pahui shejjemeejjiya iñahuahuo cajje pahui shejjee mee cani” jamaya onaaya huohui cani. ⁷ E'e, mimishi eshejjemeejji jayojja jama poani. Oe dejja quea mimishi minijje ojee jjapeequianiya ojjaña quea mimishi po mee caje o jayojjaya. ñMimishi cajaa acue, ojjaña! Jamajjeya miquianaya quea mimishi po aija, pahui eshejjemeejjiima' jayojja poaje. E'e, yahuajo nei Jodio cuaa Ejito meshijo nequiya ñajjajja cuia ca'ya poa ebacua cuana emano'yojji pojjeamajo jama jayojjaya Eyacuiñajjiya Jesosa Quito esejo mano mee ca'yonaje eseya onijje eba'e tiitii'yojji.

⁸ E'e, Jodio cuana pahui eshejjemeejjiima' ojee ijja cani Eyacuiñajjiya etiiquianaja ebacua cuana mano mee'yo jjima aca poa shahuaba'yojji. Jamaya jayojja Jesosa esejo mano'yonajejo, eseya caba'yahua mimishi'ama e'e jojo nei. E'e, jamaya ba'yanijo Jesosa eseja mimishijo mano'yonaje esejaya epajea'yojji pojjeama. Jamajjeya jiquio ecua Jodio cuaa ñajjajja cuia'yo majje ojee ijja cani jayojja, etiiquianaja bacua cuana mano mee'yo jjima

aca poa shahuaba'yojji jayojja jama eseyaya aña Jesosajo.

⁹ Yahuajo pishana eyaya miquiana huasijje pea esohui etehue'yo huoojeanaje. Ma etehue'yojo eyaya jama huohuinaje ba'a: —¡Jesosaja epeejjii quea mimishi nee poani nijje a'a jjapeequijji! ¡Joya pea cojjojji nijje a'a jjapeequijji! ¡Ona napajji nijje, quea mimishi jjashahuabaquiani nijje pea'ai a'a jjapeequijji! —eyaya miquiana huasijje tehuenaje.

¹⁰ Eyaya jamaya tehuenaaje Jesosaja epeejjii quea mimishijo. Jesosaja epeejjii pojjeamajo jamaya tehue jjima. E'e, mimishi cuana quea huiso nee yani: Quea nahue poani, sii poani, eshahua nijje mimiani pea'ai. Jamajjeya dejja mimishi pejjejo ba'e sa po'yo ajjajo jiquio meshijo ba'e meemee ajja. ¿Achejo dejja mimishi chama' huasijje eba'ejji? ¹¹ Beca cuana ca ca jama po nishoani ba'a: —Epeejjii cuana, eya Jesosaja epeejjii pea'ai —poani. Jamatii oya cuana aje oe quea mimishi poani: Pea cojjojji poani, quea dejja tai, quea nisrehui poani, quea mimijjequijea poani, meshi epaana bihuia cani, ishi'ishiani, sii poani, shajjama' poani pea'ai. ¡Jesosaja epeejjii jama poajo, onijje a'a jjapeequijji, a'a anioquejji e'ijjia'ijjiajji!

¹² Eyacuiñajjiya eya huoojea jjima Jesosaja epeejjii pojjeama tecueaa jama ba'a: —¡Miquianaya quea ja'a pojjeama ba'yanijo quea nee nee poaje!

¡Eyacuiñajjiya ca ca oya cuana categueajea cahua! Ohuaya ecuana huoojea canaje Jesosaja epeejjii quea mimishi cuana jjabahuejjaqui meeya. ¹³ Jamajjeya Jesosaja epeejjii miquiana nijje nequi

quea mimishi poajo, ¡niñeshe'acue: —Miya quea ja'a pojjeama poani —oya acue!

Jamajjeya ¡Eyacuiñajjiya esohui yahuajo tehue'yo jayojja jama acue! Yahuajo nei nei jama poa ba'a: “Ecuea epeejji quea mimishi poanijo, ¡a'a miquiana nijje nequi meeiji, ecuea epeejji cuana nijje! ¡Huoojeacuayajea'yocue esecue yasijje!”

Jamaya yahuajo nei Eyacuiñajjiya esohui etehue'yo poa.

6

¡A'a epeejji cuana dojodzi dejja etii yasijje ca Jesosaja epeejji pojjeama huasijje!

¹ Miquianaya Jesosaja epeejji poanijo ecuea huapa pojjeama cuana poani. Jamajjeya Jesosaja epeejji nijje quea quene po majje Jesosaja epeejji pojjeama huasijje dejja etii yasijje ¡a'a oya dojodzi ojaya ejjashahuabaquijji baa! Chojja. ¡Jesosaja epeejji etii yasijje poquicue! Eyacuiñajjiya ojaya epeejji etii huohui meesahua caje quea ja'a nee ojjaña quea bei epo meeiji. ² E'e, eseya Jesosaja epeejji cuana quijje onijje ona huoojeajji poaje. Jamajjeya ijjeyahua nei ojjaña ojaya epeejji cuana quea bei po meesahuacue pea epeejji cuana nijje! ¡O huoojea'yojji nei jayojja jama oya cuana quea pame nee ameesahuacue! ³ E'e, Jesosa poe o'oyajo, eseya esohuidojiji eyajo nequi huoojea'yojji poaje'yo onijje pea'ai. Jamajjeya jiquio meshijo nequiya ¡Jesosaja epeejji pea cuana nijje jjamimicuajea nobiajeaquiani quea bei po meecue! ¡Oya cuana shajja'ajja majje quea ja'a

nee huohuicue! ⁴ Jamajjeya Jesosaja epeeiji nijje jjamimicuiajea nobiajeaqui majje ja'a poquijji dejja etii yasijje, Jesosaja epeeiji pojjeama huasi-jje miquiana quea bei epo meeiji! ⁵ Jamaya poanijo miquianajaya ejjashahuabaquijji quea tai poani. Jamajjeya miquianaya jjamimicuiajea nobiajeaqui majje ja'sesa epeeiji etii iyaacue! Ohuaya miquianaya quea bei po mee caje pea epeeiji nijje. ⁶ Jamajjeya Jesosaja epeeiji nijje mimijaji majje ja'a jja oe oya dojodzi Jesosaja epeeiji pojjeama huasijje ojaya ejjashahuabaquijji huohui meeya! Jamatii miquianaaya ca ca quea tai aña.

⁷ E'e, miquianaya ca mi ca oe Jesosaja epeeiji pojjeama jayojja jama poani. Jesosaja epeeiji nijje jjamimicuiajea nobiajeaqui majje oya dojoña Jesosaja epeeiji pojjeama huasijje. ja'a jja oe jamaya pojji! Chojja, miquianajaya epeeiji minijje quea tai poajo, jamatii ja'a jjamimicuiajea nobiajeaquijji! ¿Yajjajo acuae jjaya jamatii mi sii mee'ajjaña? ⁸ Miquianaaya ca ca oe Jesosaja epeeiji cuana minijje nequi quea tai aña, oya cuana dasiaña, onajaya aquiana siiyaña pea'ai, de. Jamaya quea tai. ⁹ JJashahuabaquicue oe! Miquianajaya eba mimishi cuana Eyacuiñajji nijje eba'ejji pojjeama eyajo ojaya cuiñajji eyacuajo. Eyacuiñajja esohui a'a pajea'yojji jama ba'a: "E'e jojo nei ojjaña quea mimishi poani pea nijje, ojjaña eshahua nijje mimiani, pea ja ehuanase sii cani pea'ai, onaja yahue sii cani pea'ai, dejja cuana pea dejja nijje jjacojoquiani, epona pea epona nijje yahue nisho poani pea'ai, ¹⁰ siipojji cuana pea'ai, quea dejja tai poani pea'ai,

ehuoo nei po huicha'a huicha'ani pea'ai, pea siajje ajji poani pea'ai, shajjama' cuana pea'ai Eyacuiñajji nijje eba'ejji pojjeama eyajo ojaya cuiñajji eyacuajo". ¹¹ Jamaya yahuajo miquianaya poanaje Jesosa nijje jjapeequi jjimahua. Jjeya ca ca esejaya Emeshi Mese neiya, Jesosa Quito-hua miquianajaya mimishi cuijea ca'yajje quea boejea po mee ca'yonaje. Jamajjeya miquianaya jjeya ba'yani Eyacuiñajji. E'e, Jesosa Quito esejaya Emeshi Mese nei miquianajaya mimishi cuanajo mano'yonaje. Miquianaya quea boejea po mee ca'yonaje. Jamajjeya Eyacuiñajjiya miquianaya ba cani mimishi'ama. Edojjoshahua Pameya miquianaya Eyacuiñajjiya esohui jayojja jama ba'e meesahua cani pea'ai. Jamajjeya ojjaña Jesosaja epeeiji cuana nijje quea bei, quea pame nee ba'ecue! ¡Mimishi'ama pocue!

¡Eyacuiñajjiyo chacocue quea pame nee!

¹² Epeeiji cuana, miquianaaya eya huohui'ajjanaje esohui etehue'yojo jama ba'a: —Eya ca ca Jesosaja epeeiji. Jamajjeya eyaya ojjaña aña mete'amaa jjejojo, ma Jesosaja epeeiji pojjeama cuaa acani —jamaya miquianaya poani quea quehua jjashahuabaquianijo.

Eya ca ca jama poani ba'a: —Pea cuana jayojja jama ba'e majje miquianaya quea pame pojjeama poaje —eya poani. E'e pojja'a eya mimije jama ba'a: —Ojjaña pea cuana jayojja jama eyaya aje —poaje.

Jamatii eya jamaya emimiji pojjeama. Chojja, jama po majje quijje eyaya jamaya apajea'yo jjima aje. E'e, jiquio ecua echacojiya o chacomeejjiya

esohui apajea meemee ajja jayojja jama quijje eyaya maya apajea'yo jjima aje.

¹³ Bobi ijzia majje see ai yasijje dobiquiani. Bobi chamajo see ai quea nee poaje. Jamatii quijje eyajo ba'e'yo majje eseya bobi ijzia pajeaje'yo. Quea shoe pojjeama poaje'yo. Jamaya Eyacuiñajjiya acaje'yo. Jamajjeya ja'a jjashahuaba tiitiquijji bobijo quea jejje nee epojjijo! Jama jjashahuabaquime pocue ba'a: —Eya Eyacuiñajjiya equi jayojja. Oya ecuea eyamijo ba'yani. Eya quea jejje jayojja po mee cani.

E'e, Emeshi Mese neiya, Eyacuiñajjiya ecuea eyami quea pame nee pana ca poa. Jaahuana cani quea pame nee pea'ai oja equi jayojja epoiji. Ohuaya ecuana pana ca poa quea mimishi nee pea nijje epoiji pojjeama; onajaya ehuanase, yahue poja'a esijji pojjeama pea'ai. ¹⁴ Jamajjeya esejaya Emeshi Mese nei Jesosa Quito mano'yajo, Eyacuiñajjiya oya shequi mee ca o'oyanaje. Jamaya ohuaya eseya ba'e mee caje o'oya pea'ai. Quea ca'a nee nee poaniya jjejojo ojjaña acaje'yo ohuaya.

¹⁵ Jesosa Quitoja epeejji poanijo ojjaña eseya ojaya eyami jayojja jama poani. Jamaya miquianajaya eba. Jamajjeya ipea cojjoji nijje a'a jaajji! Chojja. Jamaya poajo Eyacuiñajji miquiana nijje quea tecue nee nee poaje. ¹⁶ E'e, dejja epona quea mimishi nijje jaa majje oya cuana oe yamime jayojja poani. Jamaya Eyacuiñajjiya oya cuana ba cani. Mi quea eba Eyacuiñajjiya esohui etehue'yo jama ba'a: “Dejja epona nijje jaa majje oya cuana oe yamime jayojja poani”. ¹⁷ Emeshi Mese nei

Jesosa nijje jjapeequi majje ca ca eseya o jayojjaya jama jjashahuabaquime poani pea'ai.

¹⁸ Jamajjeya eyaya miquianaya huohuaña jama ba'a: Dejja cuana, jepona miquea ehuanase pojjeama nijje a'a jaajji! Epona cuana, ja'a pea dejja nijje jaajji! ¡Jiñayii acue! Quea mimishi po majje miquea eyami nei quea tai poaje. ¡Ojjaña mimishi cuana a'a ajji pea'ai! ¹⁹ ¡Bacue! Miquea eyami Edojjoshahua Pameja equi jayojja jama poani. Oya mique yami dojjo huasijke nequidobiqui'yonaje. E'e, Eyacuiñajji mi huoojeajji poani. Ohuaya huoojea ca'yonaje Edojjoshahua Pame miquiana que dobiquiya. ²⁰ Oya mi mesenajji epo. E'e, Jesosa Quito mano'yonaje miquianaja mimishi cuijea'yojji sosejje. Jamajjeya jojaya esohui jayojja jama ba'ecue! Miquianaya jama ba'yajo, pea cuaa mi ba majje Eyacuiñajji bihuia caje jama ba'a: — Eyacuiñajji quea ca'a nee nee. Ojaya epeejji quea pame nee ba'e meesahua cani —poaje.

7

¿A'a shacuima' nequi cuana cajjahuanquiahua?

¹ Yahuajo pishana miquianaaya esohui tehuena je ecuea ebajji. Ma esohui etehue'yojo eya miquiaaya huohui'ajjanaje jama ba'a: — ¿A'a shacuima' nequi cajjahuanquiahua? ¿A'a jamatii canequiahua pojja'a? —huohui'ajjame miquianaaya eya anaje.

Jamajjeya jjeya eyaya miquianaya saja'aña. E'e, shacuima' nequi eshacui sa po'yo ajjajje ca jamatii canequiahua. Jamaya quea pame. ² Jamatii quea

huiso shacuima' nequiya epona cuana jea ba cani, onaja huanase sii cani. Epona ahuema'ani jamaya quea mimishi poani pea'ai. Jamajjeya cajjahua-naquiahua, cajjahueaquiahua pea'ai, ojjaña. Jamaya quea pame nee.

³ Yahue cuaa, ¡miquea ehuanase quea bihui nee po meecue! ¡Jaahuanacue quea pame nee pea'ai! Ehuanase cuaa, ¡miquea yahue quea bihui nee po meecue! ¡Onijje tii jaacue! ⁴ ¡Mique yahueya huohui cani jayojja jama pocue onijje jaanijo! Yahue, ¡miquea ehuanase nijje jaanijo ohua sa cani jayojja jama acue! ⁵ E'e pojja'a yahue, ehuanase pea'ai mimi sa poani Eyacuiñaggi nijje beca cahuime. Eyacuiñaggi nijje mimianijo yahue ojaya ehuanase nijje jaa sa po ajja pojja'a. Jamaya quea pame, ca ehuanase yeno'ama poanijo. Beca cahui cuana Eyacuiñaggi nijje mimi majje ¡yahue oja ehuanase nijje cajjacoccoqui o'oyahua! Jamajjeya ehuanase yeno'ama, yahue pea'ai yeno'ama poaje. Quea yeno poajo, eshahuua oya cuana quea mimishi jjashahuabaqui mee ca chana' pea cojjojji epojji. E'e, yahue, epona pea'ai ca'a'ama.

⁶⁻⁷ Ecuea epeejji cuana, jiquio esohui etehue'yo ecuea ejjashahuabaquijji jama ba'a: Eya ca ca shacuima' nequi. Ojjaña Jesosaja epeejji e jayojja jama shacuima' nequi, ahuema'ani pea'ai quea pame nee chaco majamajaje Jesosa Quitojo. Jamatii eyaya miquianaya jamaya epojji pojjeama huohuiaña. Eyacuiñaggiya beca cuana quea pame nee ba'e meesahua cani jamatii shacuima' nequi, ahuema'ani pea'ai. Pea cuana ca ca jamatii ani quea mimishi po chana'. Jamajjeya oya cuana cajjahua-naquiahua, cajjahueaquiahua pea'ai. ¡Ey-

acuiñajjija ejjashahuabaquijji mijo ohua acani jayojja jama acue!

⁸ Jamatii eya jjashahuabaquiani shacuima' nequijo, eshacuimanojo, ahuema'anijo, e'ahuemanojo pea'ai jama ba'a: Eya ee nei, shacuima' nequi. Miquianaya e jayojja jama mee nei nequi majje jama quea pame nee nee poaje. ⁹ Jamatii e'e pojja'a miquianaya beca cuana ehuanase chamajo mimishi'ama eba'ejji pojjeama. Jamajjeya ijjahuanaqueicue! E'ahuemano cuana, miquiana ahuema'ani jayojja mimishi'ama eba'ejji pojjeama. Jamajjeya ijjahueaqui'yocue! Jamaya quea pame. Miquianaya quea yeno mee nei ba'yanijo quea mimishi po chana'. Jamaya quea tai.

¿A'a Jesosaja epreejji cuana huei cajji?

¹⁰ Jjeyahua nei eyaya Eyacuiñajjija esohui tehueje yahue cuana huasijke, ehuanase cuana huasijke pea'ai miquianajaya ebajji jama ba'a: Ehuanase cuana, jmiquea yahue oe nei nijje ba'ecue! ¡A'a oya hueiji! ¹¹ ¡Huei majje ca oe ahuema' ba'e tiitii'yocue! ¡E'e pojja'a miqueahue jjeshe o'oyacue! Jamaya quea pame nee. Yahue cuana, joya jayojja a'a miquea ehuanase hueiji! ¡Jaahuana tiitiicue! ¡Eyacuiñajjija esohui jayojja jama acue!

¹² Jjeya ca ca eyaya pea esohui tehueje, ma Jesosaa tehue mee jjima, ecuea ejjashahuabaquijji tehueje pea cuana huasijke, Jesosaja epreejji cuana huasijke. Yahue cuana, e'e pojja'a miya Jesosaja epreejji poani, miquea ehuanase Jesosaja epreejji pojjeama. Jamatii miquea ehuanase minijke ba'e

sa poanijo, ja'a oya hueiji! ¹³ Ehuanase cuana, e'e pojja'a miya Jesosaja epeeiji poani, jamatii mique yahue Jesosa nijje jjepeequi jjima. Miqueahue minijje ba'e sa poanijo, ja'a oya hueiji! ¹⁴ Miya Jesosaja epeeiji poanijo, miqueahue minijje ba'e sa poanijo, Eyacuiñajjiya oya quea pame acaje Jesosaja epeeiji nijje ba'e sa poanijo. Yahue cuana, oya jayojja miquea ehuanase miquea huei jjima minijje ba'e sa poanijo, Eyacuiñajjiya oya quea pame acaje pea'ai miya Jesosaja epeeiji poanijo. Oe yamime jayojja ohuaya micuana ba cani. Jamajjeya ohuaya miquianajaya ebacua cuana jaahuana caje pea'ai. Jesosaja epeeiji pojjeama bacua cuana jama pojjeama oya cuana.

¹⁵ Jiquio esohui bacute pea'ai, epeeiji cuana! Eyacuiñajjiya ojaya epeeiji cuana quea bei ba'e mee sa acani. Jamajjeya miquea ehuanase Jesosaja epeeiji pojjeama jjejojoya minijje ba'e sa po'yo aija po majje capoquiahua. E'e, Jesosaja epeeiji pojjeama Jesosaja epeeiji nijje ba'e sa po'yo aija capoquiahua, epona, yahue pea'ai. Jamajjeya Jesosaja epeeiji e'ahuemano jayojja anije, eshacuimano jayojja jama nequije. ¹⁶ Jamajjeya ehuanase cuana, jmiquea yahue nijje anicue, jamatii oya Jesosaja epeeiji pojjeama! Oya Jesosa nijje jjapeequije pojja'a mi quea pame ba'yani ba majje. Yahue cuana, jmiquea ehuanase Jesosaja epeeiji pojjeama nijje ba'ecue! Jamajjeya oya Jesosa nijje jjapeequije pojja'a.

¡Eyacuiñajjiya ejjashahuabaquijji jayojja jama ba'ecue!

¹⁷ Eyacuiñajjiya ojjaña miquianaya ojaya echacojji po mee cani. Oe epeejji pea epeejji jayojja jama chaco ajja. E'e, Eyacuiñajjiya miquianaya huoojea cani ojo chacohua. Peapea chaco meeme asahua cani. ¡Jamaya atiitiicue! Jamaya eyaya huohuiaña ojjaña Jesosaja epeejji cuana ojjaña cuiñajji cuanajo ba'e yasijke. ¹⁸ Jamajjeya oe epeejji Jesosa nijje jjapeequianijo cuiishasha jehuisejjajea ca'ya poa, Jodio cuaa jjejojo. ¡Jamatii nequicue! Pea dejja cuiishasha ejehuisejjajea'yo pojjeama Jodio dejja pojjeama jjejojo. ¡Jamatii nequicue, cuiishasha jehuisejjajea jjima tii! ¹⁹ Jjeya nei Jesosa nijje jjapeequianijo, Eyacuiñajjiya eseya jama ajjima ba'a: —¡Cuiishasha jehuisejjajea meecue! —po ajja eseya jjeya.

—¡A'a cuiishasha jehuisejjajea meeiji! —po ajja pe'aai jjeya.

Chojja. Jjeya Jesosa nijje jjapeequianijo, Eyacuiñajjiya eseya jama acani ba'a: —¡Ecuea esohui jayojja jama ba'ecue! —ohuaya eseya acani.

²⁰ Jamajjeya ¡miquianaya Jesosa nijje jjapeequi jeahuajo jayojja jama anicue quea pame nee! Jama ba'a: ²¹ Eyacuiñajjiya miquianaya iyaa canajejo, beca cuana echacojji sosema' poanaje. ¡Jamaya anicue yeno'ama! Jamatii miya miquea echaco meseja nahue'amajo, poqui sa po majje ¡poquicue, miquea yajjijo chacoquicue! ²² Jamajjeya beca cuanaja echaco mese yanijo, ¡ojaya esohui jayojja jama cachaco cahua! Esejaya Emeshi Mese nei Jesosaa oya cuana iyaa cajje ca ca oya echaco mesema' jayojja jama jjashahuabaquime poani. ¡Jesosaja ejjashahuabaquijji jayojja jama ca'a cahua! Oya

jayojjaya pea cuaa echaco mesema' nequiya chaco cani ojaya yajjijo. Jamatii Jesosa Quito oya cuana iyaa cajje ojaya ejjashahuabaquijji jayojja jama ca'a cahua pea'ai. Jama ba'a: Jesosa nijje jjapeequi jjimahuajo eseya eshahuaja echacoiji sosema' poa ojjaña. Jesosaa iyaa majje eseya poqui mee canaje eshahuajo echaco majajji pojjeama. Jamajjeya Jesosaja ejjashahuabaquijji jayojja jama ejja'a qui, esejaya Emeshi Mese neija.

²³ E'e, Eyacuiñajjiya eseya jjeshe ca'yonaje quea nahue nee nee, Jesosa Quito esejo mano'yonaje sosejje. Jamajjeya ¡ojaya esohui jayojja jama atiitiicue, onajaya pojjeama! ¡Ojo oe chacocue!

²⁴ ¿Ae shai po aninaje miquianaya Eyacuiñajjiya iyaa jjimahuajo? ¡Jamaya atiitiicue quea bei! Eyacuiñajjiya miquianaya jaahuana caje'yo quea pame nee.

*Pea etehue'yo shacuima' nequi yasijke,
ahuema'ani yasijke pea'ai*

²⁵ Miquianajaya etehue'yojo yahuajo eya huohui'ajjanaje nequiaa jama ba'a: —¿Yajja acuae poaje shacuima' nequi, ahuema'ani pea'ai? —tehuenaje nequiaa.

Maya esejaya Emeshi Mese neiya Jesosaa eya huohui jjima shacuima' nequijo, ahuema'anijo pea'ai. Eyaya ecuea ejjashahuabaquijji tehueña miquianajaya ebajji. Jamatii Eyacuiñajjiya eya babaca canaje esohui quea pame nee Jesosaja ehuohuijji. Ohuaya eya esohui e'e nei huohui meesahua cani tii pea'ai. Jamajjeya ¡ecuea esohui shajja'ajjacue!

²⁶ Jjeya Jesosaja epeeiji pojjeamaa eseya napa cani quea huiso nee. Jamajjeya quea camaja eba'ejji. Jamajjeya epona cuana, jjeya nei miya ahuema'ani, ijamataya ba'ecue! Shacuima' nequi cuana pea'ai, ijamatii ba'ecue! Jamaya eya jjashahuabaquiani. ²⁷ Jamatii miquea ehuanase yanijo ja'a oya hueiji! Miya shacuima' nequiya, ja'a ehuanase sajji! ²⁸ Eponajo jjahuanaqui sa poanijo miya quea mimishi pojjeama; jamaya quea pame. Epona, miya jjahueaqui sa poanijo quea pame, quea mimishi pojjeama pea'ai. Jamatii jjahuanaqui majje quea camaja poaje miquianajaya eba'ejji, bobijo, aquiana eba'ejjijo. Ehuanasejo quea huiso jjashahuabaqui majamajaje. Ebacua quea huiso po majje quea camaja poaje. Eya ca ca shacuima' nequi. Eba'ejjijo jjashahuabaqui tiitii ajja. Jamajjeya miquianaya e jayojja nequianijo miquea eba'ejji camaja'ama pishana poaje.

²⁹ Ecuea epeeiji cuana, eya jjashahuabaquiani jama ba'a: Epoja Jesosa Quitoja epoe o'oyajji beshahua nei apoa. Jamajjeya ja'a jjashahuaba tiitiiquijji miquea ehuanase neijo! ¡Jesosa Quitojo oe jjashahuaba neineiquicue! ³⁰ E'e, Jesosa Quito poe o'oyani. ¡Ojaya epoejjijo jjashahuaba tiitiiquicue! Jamajjeya ja'a quea yeno po tiitiijji eba'ejji quea camajajo, emano'yojo pea'ai! ¡Quea bihui nee nee poani, a'a jjashahuaba tiitiiquijji pea'ai! ¡A'a jjashahuaba tiitiiquijji aquiana jjeshejjijo, meshi cuana jjeshejjijo pea'ai! ³¹ Echaco quea huisojo jjashahuabaquianijo ja'a Jesosa Quitojo jjashahuabaqui pajea'yojji! Oya Jesosa poe o'oyajo jiquio meshi cuana, ojjaña

aquiana cuana pea'ai chama'yo tii poaje'yo.

³² Jamajjeya ¡a'a miquianajaya aquiana quea huisojo jjashahuabaqui majamajajji! Jesosaja epeejji shacuima' nequi jjashahuabaquiani Jesosa Quitojo, ojaya ejjashahuabaquijji jayojja jama a sa neinei poani tii. ³³ Yahue ca ca jjashahuabaquiani ojaya ehuanase quea bihui nee epo meeji. Jamajjeya oya quea huiso aquianajo jjashahuabaquiani. ³⁴ E'e, shacuujji Jesosa Quito oe neijo jjashahuabaqui tiitii ajja. Oya ojaya ehuanasejo quea huiso jjashahuabaquiani pea'ai. Epona Jesosa Quitoja epeejji ahuema'ani Jesosajo jjashahuabaquiani. Jesosaja ejjashahuabaquijji jayojja jama a sa poani. Ojo chaco sa neinei poani pea'ai. Oja yahue enequijo, ehuanase jjashahuabaquiani quea huiso ojahue quea bihui po meeji. Jesosa Quito oe neijo jjashahuabaqui tiitii ajja. Jamajjeya oya quea huiso aquianajo jjashahuabaquiani.

³⁵ Jamajjeya epeejji cuana, eyaya jiquio esohui tehueña miquiana quea pame ba'e meesahuajji, mijo quea camaja epo meeji pojjeama. E'e, eyaya miquianaya jama ajjima ba'a: —¡A'a jjahueaquijji! ¡Miquianaya quea pona jea nee po majje jamatii a'a jjahuanaquijji! —jamaya ecuea miquianaya huohui jjima. Chojja, eyaya miquianaya huohuiaña jama ba'a: —¡Jesosa nijje quea ja'a nee jjapeequicue! ¡Ojaya esohui jayojja jama ba'ecue! ¡Quea huiso nee jjashahuabaquicue Jesosajo, aquiana cuanajo pojjeama! ¡Onije chacocue! —jamaya eyaya aña miquianaya.

³⁶ Shacuima' nequija ebajji eyaya jama tehueña ba'a: E'e pojja'a miquianaya yahuajo

jama poa ba'a: —Ecuana ejjahuanaquijji pojjeama Jesosaja epeejji pojjeamaa ecuana quea huiso napa canijo. Quea camaja nee poaje —poa yahuajo.

Jamajjeya shacuima' nequi cuana, miquea eshiye mese ahuema'ani jaajaa epo, miya huana sa neinei poanijo jojo jjahuanaquicue! Jamaya quea pame nee, mimishi'ama. ³⁷ Jamatii shacuima' nequi oja shiye nijje ojaya ejjashahuabaqui'yojjijo jama poaje pojja'a ba'a: —Eya ca ca iña jjahuanaqui sa po'yo ajja pea'ai. Eya quea pona jea nee pojjeama, quehuajje jjacojjoqui ajja nei nei —jamaya e'e jojo nei jjashahuabaqui majje jamatii canequiahua oya cuana, jjahuanaqui jjima tii. Jamaya quea pame nee nee. E'e, onaaya Jesosaja epeejji napa canijo, quea camaja poaje jjahuanaqui majje. ³⁸ Jamajjeya shacuima' nequi cuana, miquea eshiye mesejo jjahuanaqui majje miyaya quea pame aña. Eshiye mese mi huana majje ca ca miyaya quea pame nee nee aña. E'e, miya Jesosajo nei jjashahuabaqui sa poani.

Paboja esohui e'ahuemanojo

³⁹ Epeejji cuana, jiquio esohui eyaya tehueaña Jesosaja epeejji e'ahuemanoja ebajji jama ba'a: Epona, ¡miqueahue eshe nequijo, onijje tii anicue! ¡A'a oya hueijji! ¡Miqueahue mano'yajo oe pea dejjajo jjahueaqui'yocue ca jjahueaqui'yo sa po majje! ¡Jesosaja epeejjijo oe jjahueaqui'yocue, epona cuana! ⁴⁰ Jamatii ecuea ejjashahuabaquijji e'ahuemanojo jama ba'a: Miqueahue mano'yajo, ¡mee nei anicue, ahuema'ani jama! Jamaya miya quea bihui nee nee poaje'yo. Edojjoshahua

Pameya eye jjashahuabaqui meesahua canijo,
ecuea esohui e'e nei.

8

*¿A'a bobi eshahuaja e'ijjiajji nisho
ba'ehuanasohua majje ijja cajji?*

¹ Yahuajo miquianaaya ecue bajji tehueneaje. Jama huohui'ajjame nequiaa iña anaje ba'a: —¿A'a noe eyacuiñajji nishoja e'ijjiajji nisho, eshahuaja e'ijjiajji nisho pea'ai ba'e huanasohua majje ijja cajji? ¿A'a e'ijjiajji pojjeama pojja'a? —eya huohui'ajjanaje nequiaa.

Jamajjeya jjeya eyaya miquianaya saja'aje jama ba'a: Pea cuaa bobi edahua'yo quia cani eyacuiñajji nisho huasijje, eshahua cuana huasijje pojja'a onijje ejjapeequijji, mase'ama epo meeiji. Beca cuana jama poani ba'a: —Ecuana eba epana'yo acui ejehui'yo, meshi epana'yo pea'ai, Eyacuiñajji pojjeama. Jamajjeya maya bobi ijja ca'yojji.

E'e jojo nei. Jamatii jamaya poanijo miquea ejjashahuabaquijji quea pame pishana. Ojjaña miya ojjaña ba epo poso poanijo quea pame pojjeama poaje. Pea ejjashahuabaquijji quea pame nee nee jama ba'a: —¡Pea epeejjí cuana ejja'asahuaqui quea pame nee! ¡Quea jaji nee ejjapo meequi!

² E'e jamaya quea pame. Pea cuana jama jjashahuabaquiani ba'a: —Jamatii ecuea eba nei nei quea huiso.

Jamaya jjashahuabaquianijo oya quea ja'a jjashahuabaqui jjima. ³ Quea Eyacuiñajji jea nee

poanijo ca ca, ojaya eba eseya ojaya epeejji nei poani.

⁴ Jamajjeya jjeya eyaya miquianaya huohuije bobijo, ma eshahua huasijje, eyacuiñajji nisho huasijje quia canijo. Quia majje pea cuaa bobi ijija cani. Esejaya eba eyacuiñajji nisho acui ejehui'yo, meshi epana'yo pojja'a, Eyacuiñajji e'e nei pojjeama. Eyacuiñajji e'e jojo nei oe nei yani. Jamajjeya bobi eyacuiñajji nisho huasijje quia majje eshahuaja e'ijjajji nisho ba'ehuanasohua ijija ca'yoji eseyaya. Jamaya quea mimishi poani pojjeama. ⁵ Pea cuana ca ca jjashahuaba quehuaquian i jama ba'a: —Eyajo, meshijo cuana pea'ai quea huiso eyacuiñajji yani.

Jamaya jjashahuaba quehuaquianijo quea huiso cuaa eyacuiñajji nishojo chaco cani, eshahuajo pea'ai. E'e, acui ejehui'yo, meshi epana'yo pojja'a, eshahua pojja'a, emeshi mese pea'ai Eyacuiñajji poso acani pea cuaa. ⁶ Esejaya ca ca eba Eyacuiñajji oe nei yani. Oya esejaya Chii ai. Ohuaya ohuaye nei ojjaña aquiana cuana pana ca'ya poa. Eseya onijje jjapeequian i, ojaya esohui shajja'ajjaña pea'ai. Jesosa Quito esejaya Emeshi Mese oe nei poani pea'ai. Yahuajo nei Eyacuiñajjiya Jesosa Quito nijjeya ojjaña pana ca'ya poa. Nequi mee cani pea'ai. Jesosa Quito hua eseya ba'e mee cani pea'ai, ojaya epeejji nei cuana.

⁷ E'e jojo nei Eyacuiñajji oe nei yani esejaya Chii ai. Jamatii jamaya Jesosaja epeejjija ba jjima beca cuanaja. Yahuajo Jesosa Quito ba jjimahuajo onaaya bobi edahua'yo eshahua quea bihui po mee'yoji ijija canaje quea

huiso. Jjeya ma bobi ijzia majje oya cuana quea mete nee jjashahuabaquiani jama ba'a: —¡Dee! Eya eshahuaja epeejji jayojja jama poani o'oya. Quea mimishi poani —jamaya eshahuajo jjashahuabaquianijo, e'e, oya cuana quea mimishi poani.

⁸ Miquianaya quea quehua jjashahuabaquiani jama ba'a: —Eyacuiñajji ecuanajo quea bihui nee pojjeama poaje, ca ojjaña bobi ijziañajo. Eyacuiñajji ecuanajo quea bihui nee pojjeama poaje, ca ecuaa pea bobi ijzia ajjajo —poani beca cuana.

Chojja. Eyacuiñajji ese nijje quea bei poani Jesosa nijje jjapeequianijo, bobi ijziañajo pojjeama.

⁹ Epeejji cuana, ¡shajja'ajjacue mo! Miquianaya quea jjashahuabaqui ja'a. Jamajjeya bobi eshahuaja e'ijziajji nisho eba'ehuanasohua ijzia majje miquianajaya eba jamaya poani quea mimishi pojjeama. Jesosaja epeejji ca'a'ama cuana ca ca quea jjashahuabaqui ja'a pojjeama quea mimishi po o'oya mee chana'. ¹⁰ Jama po chana' ba'a: Miya eyacuiñajji nishoja equijo bobi ijzia ani ba majje ohuaya ijzia caje pea'ai pojja'a. Ijjia'ijzia ani, oya jjashahuabaquije eyacuiñajji nishojo, eyacuiñajji nisho bihuia cani poso oya quea ja'a pojjeama poaje. ¹¹ E'e, mi ba majje mi jayojja jama ma bobi ijzia majje oya quea mete poaje: —E'e, eya eshahuaja bobi ijzia majje quea mimishi po o'yanaje —poso jjabaquije.

Jamajjeya Eyacuiñajji onijje quea quene poaje poso oya quea yeno poaje. Oja mimishijo Jesosa Quito mano'yonaje pea'ai. Oya mique chahua jama. Jamajjeya ¡oya quea yeno po chanajo a'a

maya noe ijjiajji! ¹² Miquianaya Jesosaja epeeiji cuana quea ja'a poani. Jamatii pea epeeiji ja'a'ama quea bicho, quea mete poani mi jayojja jama po majje. Jamajjeya miyaya oya quea mimishi po meenaje. Jamajjeya Jesosa Quitohua miya ba cani ona mimishi po meeiji jayojja, quea mimishi pea'ai. ¹³ ¡Bacue, oe! Pea epeeiji quea mete, quea mimishi pea'ai poani eya maya noe ijjiaña ba majje, eyaya maya noe e'ijjia o'oyajji pojjeama nei nei. Jamajjeya Jesosaja epeeiji ja'a'ama quea mimishi epo meeiji pojjeama nei nei. ¡E jayojja jama pocue; Jesosaja epeeiji ja'a'ama a'a quea mimishi po meeiji!

9

¿Achajja ba'e cajji Jesosaja huoojea'yo esohui huohuijji?

¹ Ecuea epeeiji cuana Conitojo ba'e, eya ca iña e'e jojo nei Jesosaja huoojea'yo oja esohui huohuijji. Dejjaja huoojea'yo pojjeama iña iquo. Jesosaja epeeiji quea ja'a nee ba'e meesahua sa aña nei nei. Yahuajo eyaya Jesosa banaje, esejaya Emeshi Mese nei. Eshohui quea pame nee ojo eyaya huohuinaje miquiana huasijke. Shajja'ajja majje miquianaya ojaya epeeiji poanaje. Maya miquianajaya eba. ² Jamajjeya e'e pojja'a pea cuana jama poani ba'a: —Pabo Jesosaja huoojea'yo pojjeama —poani.

Jamatii miquianajaya eya eba Jesosaa huoojea cani. E'e, miquianaya ojaya epeeiji poanaje eya huohuiajje. Jamajjeya quea huiso jama

poani ba'a: —Conitojo ba'e cuana Jesosaja epee-jji poanaje Paboja esohui shajja'ajja majje. Jamajjeya esejaya eba Eyacuiñajjiya Pabo huoojea canaje; ohuaya Pabo esohui huohui meesahua cani tii —poani cuana.

³ E'e, beca cuaa eya niñebea cani jama ba'a: —Pabo ca jja ca oma Eyacuiñajjiya huoojea'yo poj-jeama.

Jamaya poajo, eyaya saja'aña jama ba'a: —Jesosaa ecuana huoojea ca'yonaje ojaya esohui huohuiya —saja'ame aña.

⁴ E'e, eya Jesosaja huoojea'yo ojaya esohui huohuijji. Jamajjeya eyaya miquea bobo ijijiaje sosema', eya sohuihuohuaña sosejje. Jamatii eya jamaya po ajja nei nei. ⁵ Jesosaja esohui huohuijji cuana, oja chahua mese pea'ai ca ca ehuanase cuana nijje poquiani esohui huohuiya. Jamaya poani Peno pea'ai. Jamaya quea pame nee. Eya jamaya po sa po majje quea pame poaje, ca ehuanase Jesosaja epeejji poanijo. ⁶ Ojjaña Jesosaja huoojea'yo esohui huohuijji cuana esohuijo nei chacochacoani tii, bobo yajjijo chacochaco ajja.

¿A'a ecuaaya oeyaya Benabe nijjeya cachacoahua bobo sosejje? ¿A'a ecuaaya oeyaya casohuihuohuiahua sosema'? ¿A'a jamaya quea pame? Eya ca ca jamaya poani ba'a: —Chojja; ecuanaya pea'ai casosequia cahua esohui huohuaña sosejje —poani eya.

⁷ ¡Bacue! Emeshi meseja huoojea'yo, ona oja esohui shajja'ajja meeiji poani ohuaya sosequia cani ojo chaco canaje sosejje. Oya jayojjaya e'acui yiye meseya acuijjajja ijjia cani acui yiye chaco canaje sosejje. Ana'ai jaahuanajjiya tojjo na ishi

cani jaahuana sosejje. ⁸ Jiquio ecuea esohui etehue'yo jayojja jama ojjaña poani. Jamaya ojjañaja eba. Jamajjeya ecuana pea'ai cabobia cahua cuaa Eyacuiñajjiya esohui huohui sosejje. ⁹ Eyacuiñajjiya Moisesi yahuajo nei nei jama tehue meeme aca poa ba'a:

“¡Ana'ai chacochacoanijo bobiacue! Eso' quishihujo poequiya tii ca'ijjia cahua; ¡a'a naba huoshojji!”

Jamaya yahuajo nei Eyacuiñajjiya tehue mee ca poa. Ohuaya Moisesi jamaya tehue meeme aca poa ana'aijo nei pojjeama jjashahuabaquianijo. ¹⁰ Ohuaya esejo jjashahuabaquianijo pea'ai jamaya tehue mee ca poa. Oya jayojjaya que chacoiji cuana, anoso sejjajji pea'ai chaco majje jama jjashahuabaquiani ba'a: —Eyaya anoso sejja sosejje quijje yeje'yo ecuea equijo e'ijjiajji.

¹¹ Jiquio ecua chacochacoijiya jayojjaa ecuaaya miquianaya sohuihuuinaje. Shajja'ajja majje Jesosaja epeeiji poanaje. Jamajjeya jjeya ecuana bobi quiaje esohui huohuinaje sosejje miquianaya quea pame nee poaje. ¹² E'e, pea esohui huohuijji sohuihuohui majje jama poani ba'a: —¡Ecuaa miquiana sohuihuuinaje sosejje bobi, aquiana pea'ai che ecuana quiacue! —poani pea esohui huohuijji.

Jamaya quea pame. Ecuaaya ca ca quea huiso nee esohui quea pame nee Jesosaja huohuinaje miquianajaya eshajja'ajjajji. Sosema'. Jamatii ecuanajaya miquianaya jama ajjima ba'a: —¡Aquiana mo che quiacue eya esohui huohuinaje sosejje! —ajjima ecuanajaya.

Chojja. Jamaya e'a jojjemo Jesosaja epiejji pojjeama siajje pome jama ba'a: —Pabohua ca jja ca esohui huohui cani quea huiiso aquiana sosejje. Jamajjeya ecuana shajja'ajja sa po ajja —siajje pome.

Jamajjeya eya aema' jayojja jama ba'yani; esohui huohuiaña sosema' ojjañaja eshajja'ajjajji.

¹³ Yahuajo nei nei Eyacuiñajjiya jama aca poa ba'a: —Jodio dejja cuaa Eyacuiñajjiya equijo chaco majje bobi Eyacuiñajji yasijje onaja quia ijjia ca poa sosema'. Jodio etii cuaa Eyacuiñajjiya equijo huo dahua ca poa Eyacuiñajji quea bei epo meeiji. Ma huo dahua tehuejea jjimahua ijjia ca poa Eyacuiñajjiya equijo chaco cani sosejje.

Maya miquea eba. ¹⁴ Oya jayojjaya esejaya Emeshi Mese neiya Jesosaa huohui canaje ojaya esohui huohuellijji cuanajo jama ba'a: —Sohuihuohui canijo, ¡sose quiacue ecuea esohui huohuellijji! —poa.

¹⁵ Jamatii eya jamaya epoji pojjeama nei nei. Esohui huohuinaje sosejje bobi edojoji pojjeama. Jjeya esohui tehueaña miquiana huasijje miquea bobi equia meeiji pojjeama. Bobijo pojjeama eyaya esohui huohuiaña. Eyaya Jesosa Quitoja esohui huohui tiitiije sosema' miquianaya. ¹⁶ Eyaya ehuohuellijji pojjeama jama ba'a: —Eyaya ca eya Jesosaja esohui quea pame huohuiaña; jamajjeya eya quea pame nee.

Chojja. Eyacuiñajjiya eya huoojea ca'yonaje Jesosa Quitoja esohui huohuiya. Esohui huohui ajja jjemo eya quea yeno nee nee pome, Eyacuiñajjiya eya quea nee nee po mee came pea'ai. ¹⁷ Eyaya

jamatii ecuea ejjashahuabaquijji jayojja jama esohui huohuiaña jojjemo jama huohuime ba'a: — ¡Sosequiacue mo esohui huohuiaña sosejje! —ame.

Yahuajo eya jjashahuabaqui jjima Jesosaja esohui huohuijji. Chojja. Eyacuiñajjiya eya huoojea ca'yonaje ojaya esohui huohuiya. Eyaya ojo sosema' jayojja quea bihui nee chacoña.¹⁸ ¿Ae sa poani eya esohui huohuiaña sosejje? Eya bejjo, bobí pea'ai sa po ajja esohui huohuiaña sosejje. E shajja'ajjajji huohui jjima jama pea'ai ba'a: —¡Che mo bejjo quiacue eya esohui huohuiaña sosejje! —jamaya ecuea ajjima.

Chojja, eya quea bihui nee Jesosaja esohui quea pame nee huohuiaña sosema'.¹⁹ Chama' dejja e huoojea'yojji esohui huohuijji. Chojja. Jesosa nijje chaco sa poanijo eya chacochacoani. Ojjañaja yajjijo chacoña. E'e, eyaya esohui huohuiaña ojjaña Jesosa nijje ejjapeequi meesahuajji.²⁰ Jamajjeya Jodio cuana nijje ba'yanijo, o jayojja jama ba'yanijo eya Moisesija etehue'yo jayojja jama aña pea'ai. Jamajjeya ohuaya ecuea esohui Jesosa Quitojo shajja'ajja caje'yo pojja'a. Moisesija etehue'yojo jjamimicuajea nobiajeaqui ajja onijje.²¹ Oya jayojjaya Jodio pojjeama cuanaja Moisesija etehue'yo ba jjimajo, eyaya onijje nequiya ohuaya jayojjaya jama aña. Moisesija etehue'yo huohui ajja. Chojja. Eyaya esohui quea pame nee Jesosaja huohuiaña ona Jesosa nijje jjapeequi meesahuajji. Jamajjeya Jesosaja esohui jama po majje Eyacuiñajjiya ejjashahuabaquijji jama aje pea'ai. Eya ca ca Eyacuiñajjiya esohui jayojja jama ba'yan iiii, shajja'ajjaña tii tii, Jesosa Quitoja. Jamajjeya Eyacuiñajji quea bihui nee poani enijje.

²² Jesosaja epeeiji quea jjashahuabaqui ja'a pishana nijje ba'yanijo eya o jayojja jama poani, Jesosa nijje ejjapee neineiqui meesahuajji. E'e, Jesosa nijje ejjapeequi meesahuajji eyaya ojjaña joya e pejjejo ba'e nijje jjapeequiani. Eyaya aje oe ojjaña pea cuana Jesosaja epeeiji quea ja'a po meesahuaña.

²³ Jamaya eyaya aña ojjaña cuana esohui quea pame nee Jesosa Quitojo eshajja'ajja meeiji. Jamajjeya eya quea bihui nee jjapeequiani Jesosaja epeeiji eyacua cuana nijje.

²⁴ ijjashahuabaquicue esho'iquiana quebanei poanijo! Ojjaña cuajicuajiani aquiana iñajji sosema'. Oe esho'i quea cuejipashi nee nee ebionei poeje. Oya oe nei iña mee caje aquiana sosema'. Jiquio ecua esho'iquiana quea cuejipashi nee cuajicuajiani aquiana iñajji jayojja jama jmiquianaya Jesosa Quito nijje jjapeequicue quea pame nee nee! ¡Ojaya esohui jama acue! Jamajjeya quijje ohuaya miquianaya quea pame nee ba'e tiitii mee caje'yo. ²⁵ Ojjaña esho'i cuana janobajjima nei cuajicuaji huicha'a huicha'ani, jjashahuabaquiani quea cuejipashi nee epoji, aquiana e'iñajji. Jamatii ma aquiana quijje pishana chama'yo tii poaje'yo. Jesosa nijje jjapee neineiquiajo ca ca quijje ohuaya eseya quea pame nee nee sosequia caje'yo, eba'ejji quea pame nee nee epo tii tiiiji. ²⁶ Jamajjeya eya Jesosa nijje jjapee neineiquiani. Jjashahuaba tiitiiquiani. Eya poqui ajja cojjama' jama; dejja ehuoo jama poqui ajja, eya. Ecuea eba Jesosaja esohui quea pame nee nee. ²⁷ Jesosaja epeeiji quea pame nee, quea ja'a nee epoji eya jjashahuabaquiani quea huiso.

E'e, ojaya esohui huohui huicha'a huicha'a majje
eya quea bicho nee nee pome Jesosaja epeeiji
pame'ama po majje. Jama poajo Jesosa Quitohua
quijje eya esosequia'yoji pojjeama. Eya ba caje
ohuaya epeeiji quea mimishi.

10

jEtiiquiaa jayojja a'a eyacuiñajji nisho ajji!

¹ Ecuea epeeiji cuana, ijiquio esohui shajja'ajjacue! Yahuajo nei nei ecuanaja etiiquiana Moisesi nijje meshi jabojo poquianijo, Eyacuiñajjiya jaahuana ca'ya poa. Eyajo ona biajje bo ai nequi mee ca'ya poa eshequiya edahua ca poani jjejojo. Poquianijo bae huo'o huasijke poe'yanaje; bae yiyesamajje ejiojji quea jabo nee po mee majje, ojjaña tii ojee ojje miji yasijke poqui meesahua ca'ya poa quea pame nee ejiojjije. ² Yahuajo nei bo quimejjejjie poquianijo, bae huo'o ojje miji yasijke poquianijo pe'a'i ecuanaja etiiquianaa Moisesija esohui shajja'ajja ca poa. Jamajjeya onajaya emeshi mese po'ya poa Moisesi. Oya jayojjaya jjeya eseya enajo besa mee cajje Jesosaja esohui jayojja jama eba'eiji. ³ Yahuajo nei meshi jabojo Eyacuiñajjiya bobo pahui jayojja oque mee ca'ya poa meshi yasijke ojjaña etiiquianaja e'ijjajji. ⁴ Ena chama' poajo, Quitohua ena jamatii cuaya meequi ca'ya poa bajjoojje etiiquianaja e'ishijji.

Jamajjeya Quitohua ojaya epeeiji cuana jaahuana cani. Etiiquiana Quitojo jama poa ba'a:
—Oya ecuana nijje poquiani, de; ohuaya ecuana

jaahuana cani. Jamajjeya ohuaya bajjoojje ena cuaya meequi canaje –poa.

⁵ Jamatii aje oe beshahua nei ojjaña ecuanaja etiiquiana quea mimishi po tiitiia poa. Eyacuiñajji bihuia jjima aca poa. Eyacuiñajji quea quene ona nijje poa. Jamajjeya beshahua nei ojjaña mano ca'ya poa meshi jabojo tii.

⁶ Eyacuiñajjiya etiiquiana quea mimishi nee nee mano mee ca'ya poa ese jjabahuejjaquijji, mimishijo quea mete epojji. Jamajjeya mimishi cuana a sa po ajja poaje'yo eseya. ⁷ E'e, ecuanaja etiiquiana eyacuiñajji nisho nijje, acui ejehui'yo nijje, eshahua nijje pea'ai mimi ca'ya poa. Eyacuiñajjiya esohui yahuajo nei etehue'yo jama poa ba'a:

“Yahuajo oya cuana ijzia'ijzia majje, ishi'ishi majje pea'ai majamaja ca poa eshahua nijje jjapeequianijo”.

Jamaya yahuajo poa.

¡A'a ona jayojja jama quea mimishi pojji eshahua nijje! Jamaya quea tai. ⁸ Etiiquiana cuana aje oe onaja ehuanasejo jaanaje, onaja yahuejo jaanaje. Quea mimishi nee nee poanijo, Eyacuiñajjiya oya cuana quea huiso nee nee, 23.000 mano mee ca'ya poa oya pojja tii. Jamajjeya ja'a jja oe ona jayojja jama pojji! ¡A'a onajaya ehuanasejo, yahuejo pea'ai ba'ejjii! ⁹ Ecuanaja etiiquiana cuana jjashahuabaquia poa jama ba'a: – Ecuna quea mimishi poajo, e'e pojja'a Eyacuiñajji quene'ama poaje ecuanaja mimishi cuanajo – jamaya poa, de.

Chojja. Quea mimishi poajo, Eyacuiñajjiya peyo cuana huoojea ca poa ona ijziaa. Jamajjeya ¡eti-

iquiana jayojja jama a'a pojji! ¹⁰ Ecuana jaya eti-
iquiana cuaa Eyacuiñajji niñeba ca poa. Jama
poa ba'a: —Eyacuiñajjiya ecuana quea pame nee
ejahuanajji pojjeama —aca poa.

Eyacuiñajji niñeba canijo, ohuaya ojaya eso-
huidojojji quea ca'a cuana huoojea ca'ya poa o
niñebajji cuana mano mee'yohua. Jamajjeya jeti-
iquiaa aca poa jayojja jama niñebame a'a ajji Ey-
acuiñajji!

¹¹ ¡A'a pajea'yojji! Ecuana jaya etiiquiana quea
mimishi poaninajejo mano ca'ya poa yahuajo nei.
Jamaya Eyacuiñajjiya amajje esohui tehue mee ca
poa esejaya ebajji. Jamajjeya jjeya ba mee cani e'e
jojo nei oya quea quene poaje esejaya mimishijo.
Jesosa Quito pojja'a jjeya poeje o'oya. ¡Jamajjeya
etiiquiana quea mimishi nee nee poa jayojja a'a
pojji!

¹² E'e pojja'a beca cuana quea quehua
jjashahuabaquiani jama ba'a: —Eya quea pame
nee poanijo eshahuaa eya quea mimishi epo
meejji pojjeama.

Chojja. ¡Jamaya jjashahuabaquicue ba'a: —
Eyacuiñajji, jeya quea pame po meesahuacue!
¡Nahue neineicue mo; quea mimishi a'a po mee
o'oyajji! —jamaya Eyacuiñajji nijje mimicue!

¹³ Eshahuaa ojjaña quea mimishi po mee sa
acani. Ohuaya miquianaya quea mimishi po
mee sa acani. Jamatii Eyacuiñajjiya miquianaya
epajea'yojji pojjeama. Ohuaya miquianaya ojaya
epeejji quea pame nee po mee canijo, eshahuaa
miya quea mimishi epo mee'yojji pojjeama. Be-
shahua nei quea mimishi po mee canijo, ¡Ey-
acuiñajji nijje mimicue: —Jesosa, ¡eshahua quea

huesha nee huoojeacue! ¡Eya quea pame po
meecue mimishi'ama epojji! —jamaya pocue!

*Jesosaja bobijijañajo ja'a eshahuaja epeejijama
pojji!*

¹⁴ Jamajjeya ecuea epeejji cuana, ¡eshahuaja epeejji cuana nijje a'a jjapeequijji! ¡Onaya eshahua nijje mimiani yasijke a'a poquijji! ¡Epana'yo cuanajo a'a jjashahuubaquijji pe'a'i! ¹⁵ Ecuea eba miquianaya quea jjashahuubaqui ja'a nee poani. Jamajjeya jecuea esohuijo jjashahuaba neineiquicue, quea ja'a nee! ¹⁶ Eseyaya Jesosaja bobijijaña oya esejaya mimishijo mano'yonaje pajea'yo jjima yajji. Jesosaja bobijijaña jjimahuajo, oja ena ishi jjimahuajo pe'a'i eseaya Eyacuiñajji nijje emimi jama ba'a: —Eyacuiñajji, miya quea pame nee nee.

Ma ena ishi jjimahuajo Jesosa Quitoja ena' ecuaya'yojo eseaya ejjashahuubaqui jama ba'a: —Jesosa mano'yonaje ecuea mimishi cuijea'yojji sosejje —jamaya jjashahuubaquime epo.

Pahui ijjiia jjimahuajo eseaya ejjashahuubaqui Jesosa Quitoja yamijo jama ba'a: —Jesosa Quito eseaya ojaya epeejji quea pame nee epo meeiji sosejje mano'yonaje.

¹⁷ Pahui mijisisi jjimahuajo oe pahui yani. Eseaya Jesosaja epeejji cuana quea huiso. Jamatii pahui oe jayojja jama eseaya poani. E'e, eseaya ojeee nequianijo eseaya nei jayojja nequiani Jesosa Quito nijje nei jjapeequianijo.

¹⁸ ¡jjashahuubaquicue ecuanajaya etiiquianajo, Jodio cuanajo! Oya cuana yahuajo nei jama poa

ba'a: Eyacuiñajji nijje emimiji cuaa noe Eyacuiñajji yasijje equia'yo dahua ca poa. Noe dahua tehuejea jjimahua ijija caninaje Eyacuiñajji nijje jjapeequianiya jjejojo. ¹⁹ ¿Ajeo acuae eyaya miqianaya jama huohuiaña, ae ba meesahuajji? Jama ba'a: Bobi eyacuiñajji nisho huasijje quia majje dejja cuaa jamatii ijija cani. Eyacuiñajji nisho eshe pojjeama, Eyacuiñajji e'e jojo nei pojjeama, de. ²⁰ Jamatii eshahuaja epeeiji cuaa bobi quia cani eyacuiñajji nisho epana'yo huasijje pojjeama. Maya eshahuaja cuana huasijje quia cani. Jamajjeya oya cuana Eyacuiñajji e'e jojo nei nijje jjapeequi ajja. Miqianaya Jesosaja epeeiji cuana, ¡a'a eshahuaja epeeiji jayojjaa jama aiji! ¡A'a eshahuaja cuana nijje pojji! ²¹ Jesosa Quito nijje jjapeequianiya ¡eshahuaja cuana nijje a'a jjapeequijji! Pea oya, de. Jamajjeya Jesosaja ena ishiañajo, oja bobi ijziañajo pea'ai ¡bobi eshahuaja huasijje equia'yo a'a ijija pea'aijji! ²² Eshahuaja cuana Eyacuiñajji boti'ama nei nei. ¡A'a esejaya Emeshi Mese nei Eyacuiñajji quea quene po meeiji eshahuaja nijje jjapeequianijo! ¿A'a miya quea ca'a nee poso jjabaquiani? ¿A'a ya Eyacuiñajji ca'a'ama poso aña? Jamajjeya Jesosa nijje jjapeequiani ¡a'a eshahuaja epeeiji po pea'aijji!

²³ Jesosa Quitoja epeeiji beca cuana jama mimiani ba'a: —Eya Jesosaja epeeiji poanijo ojjaña bobi, epana'yo huasijje quia'yo pea'ai ijija majje quea mimishi pojjeama poani —jamaya poani.

E'e jojo nei. Jamatii eyaya miqianaya saja'aña jama ba'a: —Chojja. Ma bobi ijija majje quea pame pojjeama poani. Maaya ojjaña Jesosa nijje jjapeequi meesahua ajja. Miqianaya jama jjashahuaba

quehuaquiani pea'ai ba'a: —Ecuaaya ojjaña aje mimishi'ama poanijo.

Eyaya ca ca miquianaya huohuiaña jama ba'a: —Ojjaña quea pame pojjeama e'ajji. ¡Jesosaja epeejji quea ja'a pojjeama cuana quea mimishi po mee o'oya chana'! ²⁴ Jamajjeya a'a quea quehua jjashahuabaquijji jama ba'a: —Eyaya ojjaña bobi jjesheje ecuea e'ijjiajji —jamaya poanijo miquianaya Jesosaja pea epeejji cuanajo jjashahuabaqui ajja.

Chojja. ¡jjashahuabaquicue pea cuana Jesosa nijje ejjapeequi meesahuajji quea ja'a nee! ²⁵ Jamajjeya noe edahua'yo jjesheañajo ja'a huohui'ajjajji jama ba'a: —¿A'a jiquio noe edahua'yo eshahua huasijke quia? —a'a jamaya huohui'ajjajji!

Jamajjeya ¡miyaya maya ijjiacue quea bihui nee, mete'ama! ²⁶ E'e, Eyacuiñajjiya esohui etehue'yo jama poa ba'a:

“Eyacuiñajjiya ojjaña meshi cuana pana ca'ya poa.

Ojjaña aquiana pea'ai pana ca'ya poa. Jamajjeya ojaye nei meshi, aquiana pea'ai, ojjaña”.

Jamaya poa yahuajo nei.

²⁷ E'e pojja'a Jesosaja epeejji pojjeamaa miya iyaa caje ojaya equi yasijke bobi ijjiaa. Jamajjeya ojaya equi yasijke poqui majje ¡bobi ijjiacue mete'ama! Ijjiá'ijjianijo ja'a huohui'ajjajji jama ba'a: —¿A'a jiquio noe edahua'yo eshahua huasijke quia? —a'a huohui'ajjajji! ¡Jamatii ijjiacue mete'ama!

²⁸ Jamatii ojee ijjiá'ijjianiya, pea eseja epeejjiya miya jama huohui caje pojja'a ba'a: —Jiquio bobi

eshahua huasijje quia —jamaya acajje ja'a maya bobo ijjiaggi! Ma bobo quea pame nee e'ijjiaggi. Jamatii miya Jesosaja epeejji neiya ma bobo ijjiña ba majje esejaya epeejji quea yeno poaje pojja'a. ¡A'a oya quea yeno, quea bicho po meejj! ²⁹ E'e, miya Jesosaja epeejji quea pame poaniya ijjiaje mete'ama. Jamatii mi ba majje Jesosaja epeejji quea ja'a pishana quea mete po chana' miyaya ma bobo ijjiajo. Jamajjeya ja'a ijjiaggi! ¡Oya quea bei po meecue; miya pea'ai quea bei pocue!

E'e pojja'a beca cuaa huohui caje jama ba'a: — Eyaya Jesosaja epeejji poaniya ojjaña bobo ijjiña mete'ama —acaje.

Eya ca ca jama po ajja. Pea cuana quea jjashahuabaqui ja'a pojjeamajo quea mete poanijo, eyaya ojjaña bobo ijji aija.

E'e pojja'a onaaya jama acaje pea'ai ba'a: ³⁰ — E'e, eyaya Eyacuiñaggi bihuiaña ojjaña bobo ijji jjimahuajo. Jamajjeya eyaya ojjaña bobo ijjiña mete'ama. Bobijo eyaya Eyacuiñaggi bihuiaña; jamajjeya ja'a enijke mimijajiji eya ojjaña bobo ijjiñaajo! —jamaya acaje pojja'a onaaya.

³¹ Jamajjeya jjiquio esohui bacue! Miyaya bobo ijjiñaajo, e'ishijji ishiañajo pea'ai ojjaña miquea eba'ejji jo pea'ai jjashahuabaquicue jama ba'a: — Eyaya ojjaña cuana Eyacuiñaggi bihuia mee sa aña.

³² Jamajjeya ¡quea ja'a nee ba'e tiitiicue! ¡A'a ese-jaya epeejji cuana quea mimishi po mee o'oyajji! Jodio cuana, Jodio pojjeama, Jesosaja epeejji cuana pea'ai a'a quea mimishi po mee o'oyajji! ¡E'e, quea ja'a nee ba'ecue ojjaña cuana Jesosa nijje quea ja'a nee ejjapeequi meesahuajji! ³³ ¡E jayojja jama pocue! Eya jjashahuabaquiani ona quea bei

po meesahuajji. Eya jjashahuabaqui ajja jama ba'a: —¿Ae shai ejo quea pame?

Eyaya ca ca ojjaña quea bei po mee sa aña. Jamaya eyaya aña ojjaña Jesosaja epeejji epojji.

11

1 Eyaya Jesosa Quitoja esohui jayojja jama aña. Jamajjeya e jayojja jama pocue miquianaya!

Esohui Eyacuiñajjija equiyasijje dobiqianijo

2 Ojjaña pojajo miquianaya ejo jjashahuabaquiani. Ecuea esohui jayojja jama po tiitiani, miquianaya. Jamaya quea pame. **3** Jamatii jecuea esohui etehue'yo ba neineicue yahue cuana, ehuanase cuana pea'ai! Yahue cuana ojaya ehuanase huoojeajji poani. Jesosa Quito ojjaña huoojeajji poani tii, dejja cuana huoojeajji poani, ojaya epeejji cuana huoojeajji poani. Ojaya Chii Eyacuiñajjija eyajo ani Jesosa Quito huoojeajji poani pea'ai.

4 Jamajjeya dejja cuana, Eyacuiñajjija equijo nequi onijke mimianijo, oja sohui huohui canijo pea'ai jejaahuojja cajjajea'yocue! Jaahuojjajjiya Eyacuiñajjija esohui huohui canijo Jesosa Quito cajaa ajji jayojja jama poani. **5** Epona cuana ca ca Eyacuiñajjija equijo ani onijke mimianijo, ojaya esohui huohui caqui pea'ai jjasapataquicue! E'e, epona jjasapataqui ajjajo oja yahue cajaa ajji jayojja jama poani. Jamajjeya jjasapataqui ajjajo esao cobojea majje jayojja jama poani, quea bicho poani. **6** E'e, eponaa jjasapataqui ajjaa jjejojo cacobojea cahua. Jamatii epona esao cobojea majje quea bicho nee nee poaje. Jamajjeya

bicho'ama epoji epona cajjahuojja taquiahua
Eyacuiñajjiya equijo mimianijo.

⁷ Dejja cuaa, Eyacuiñajjiya epeejjiya ejaahuojja
iya aija Eyacuiñajjiya equijo esohui huohui canijo.
E'e, Eyacuiñajji dejja cuanajo jama poa ba'a: —
Dejja cuana ojjaña e'aquiana mese poaje ojjaña
aquiana meshijo ani. Jamaya Eyacuiñajjiya ojjaña
ba mee caje ohuaya dejja pana ca'ya poa quea
pame nee oya jayojja jama epoji. Jamajjeya ja'a
epona jama pojji! ¡A'a jjahuojjataquijji nequiana
dejja! Oya jayojjaya epona oja yahueja esohui jay-
ojja jama acani oja yahueja yajji. ⁸ Eyacuiñajjiya
dejja ebionei pana coo ca'ya poa. Dejja pana majje
quijje epona pana ca'ya poa dejjaja edojjojaniji
sa'. ⁹ Eyacuiñajjiya dejja pana jjima eponaja yajji.
Chojja. Epona pana ca'ya poa dejjaja yajji. Dejja
epona huoojeajji poa. Jamaya Eyacuiñajjiya a sa
aca'ya poa. ¹⁰ Jamajjeya Eyacuiñajjiya esohuidoj-
jji cuaa eseaya ba canijo, epona cuana cajjahuoj-
jataquiahua Eyacuiñajji nijje ojee mimianijo. Ja-
majjeya ojjaña ba cani yahue epona huoojeajji
poani.

¹¹ Jamatii jjeya Emeshi Mese nei Jesosa nijje
jjapeequi majje ehuanase cuaa yahue cuana ba'e
meesahua cani Jesosa Quitojo. Yahue cuaa ehua-
nase jaahuana cani pea'ai. ¹² E'e, yahuajo nei nei
dejja pana majje quijje Eyacuiñajjiya epona pana
ca'ya poa dejjaja edojjojaniji sa', ebionei epona.
Jjeya ca ca dejja sho'i cuana eponaja mejo cuayani.
Jamatii Eyacuiñajjiya ojjaña pana ca'ya poa, ojjaña
nei nei.

¹³ Jamajjeya ijashahuabaquicue epona cuanajo!
¿A'a ojjaña ojee Eyacuiñajji nijje mimianijo epona

camimiahua jjahuojjataqui jjima? ¿A'a jamaya quea pame nee? Chojja, quea pame pojjeama. ¹⁴ Ecuanaja eba dejja cuana saoiji quea pame pojjeama. Epona jayojja poani, saoiji. ¹⁵ Epona saoiji ca ca quea pame nee nee. Eponaja esao ao ojaya ejjahuojja taquijji jayojja. Jamaya Eyacuiñajjija quea boti nee nee. ¹⁶ E'e pojja'a eponaja esao aojo, ejjahuojjetaquijji jo pea'ai pea cuana jjamimicuiajea nobiajeaquei sa poani enijje. Jamatii ecuea esohui jiquio jama ba'a: Epona cuana Eyacuiñajjija equijo cajjahuojjetaquiahua. Jesosaja epeejji cuaa ojjaña cuiñajjijo ba'eya jamaya huohui cani pea'ai.

jPea Jesosaja epeejji cuana nijje a'a quea mimishi pojji!

¹⁷ Ecuea epeejji cuana, jjeya pea esohui eyaya tehueje miquianaja ebajji. Miquianaya Eyacuiñajjija equijo ojee anijo quea pame pojjeama poani. Ojjaña cuana Jesosa nijje quea ja'a nee jjapeequi meesahua jjima. Pea epeejji cuana ca ca quea yeno po mee aña. Jamajjeya eyaya miquianaya huohuije Eyacuiñajjija equijo quea ja'a nee epojji. ¹⁸ Pea cuaa eya huohui canaje jama ba'a: —Jesosa Quitoja epeejji cuana Conitojo ba'e Eyacuiñajjija equijo ojee jjachichaqui majje jjamimicuiajea nobiajeaquiani. Oe pojji epeejji cuaa pea epeejji cuana nijje jjapeequi sa po ajja acani cuaa —jamaya acani cuaa.

E'e pojja'a miquianaya jamaya quea tai poani. ¹⁹ Jesosaja epeejji quea bei pojjeama mimicuiajeanobiajea sa poani, pea nijje jjapeequi ajja. Jamaya quea tai. Jamatii jamaya poanijo, ojjaña

ba caje ache dejja cuana Jesosaja epeeiji e'e jojo nei pojjeama, ache oja epeeiji e'e jojo nei ba caje pea'ai. ²⁰ E'e, miquianaya ca mi ca oe Eyacuiñajjija equi yasijje dobiquiani esejaya Emeshi Mese nei Jesosaja bobi ojee ijjiia poso. Chojja, Jesosajo miquianaya jjashahuabaqui ajja, oya es-ejo mano'yonajejo jjashahuabaqui ajja. ²¹ Ojee ijji'ijjiia ajja pea'ai miquianaya. Chojja, pea cuana ishoa ajja. Jamajjeya beca cuaa quea huiso ijjiia cani. Quea huiso ishi cani pea'ai, quea je-jje nee nee poani. Pea cuana ca ca quea shoe nee poani. ²² Jamajjeya bobi quea huiso ijjiia sa poanijo ¡miquianajaya equijo ijji'a'ijjiia socue! ¡A'a Eyacuiñajjija equijo quea dejja tai pojji! ¡Jesosaja epeeiji aema' a'a quea bicho po meeji ojaya bobi quea huiso chamajo! Eyacuiñajjija equijo quea tai añajo, eyaya oijaña miquianaya tecueaña jama ba'a: —¡Eyacuiñajjija equijo ani a'a Jesosaja epeeiji quea mimishi ajji bobijo!

¡Jesosaja bobi e'e jojo nei ijjiacue o pajea'yo jjima yajji!

(*Mateo 26.26-29; Macoso 14.22-25; Noca 22.14-20*)

²³ Esejaya Emeshi Mese neiya Jesosaa eya ba mee canaje jiquio esohui oja bobi ojee e'ijjiajjijo, oya esejaya mimishijo mano'yonaje pajea'yo jjima yajji. Maya yahuajo eyaya huohuinaje jama ba'a: —Oe mecajje esejaya Emeshi Mese nei Jesosaja epeeiji nishohua oya quia canaje dejja maseja equecua'yojji. Iña majje dojo canaje cuaa. Iña jjimahuajo Jesosaa oe pahui jjeshe canaje. ²⁴ Eyacuiñajji bihuia majje pahui mijisisi

canaje. Ojaya epeejji cuana jama huohuime acanaje ba'a: —Jiquio pahui emijisisi ecuea eyami. Eya miquianajaya mimishi cuanajo manoje'yo. Jamajjeya jiquio pahui ij{jiañ}ajo miquianaaya eya miquianaja mimishijo mano'yonaje pajea'yo jjima yajji —Jesosa poanaje.

25 Pahui ij{jiañ}a majje Jesosa Quitohua caneco jjeshe canaje. Eyacuiñajji bihuia ca o'oyanaje. Huohui canaje jama ba'a: —Jiquio ena canecojo nequi ecuea ena'. E'e, ecuea ena' cuayaquije'yo. Eya ojjañaja mimishijo manoje'yo. Jamajjeya Eyacuiñajjiya miquianaya huohui caje, ma ohua miquianajaya mimishi cuana cuijea caje'yo e mano'yajo, ma oja yahuajo huohui jjima. Jamajjeya jiquio ena canecojo nequi ishiañajo jjashahuaba tiitiiquicue jama ba'a: “Jesosa mano'yajo oja ena' cuayaquinaje ecuea mimishi cuijea'yojji” jamaya acue —Jesosaa acanaje.

26 Jiquio pahui, ena canecojo nequi pea'ai Jesosa Quitoja bobi poani. Jamajjeya ojee ojaya bobi ij{jiañ}a o shahuaba poquiajji, ma oya esejaya mimishijo mano'yonaje. ¡Jamaya acue esejaya Emeshi Mese nei Jesosa Quito poe o'oya jjimahuajo! **27** Jamajjeya esejaya Emeshi Mese nei Jesosaja bobi, pahui ij{jiañ}ajo ojaya ena canecojo nequi pea'ai ojee ishiañajo ja'a quea dejja tai pojji! ¡Quea nisrehui a'a pojji! ¡A'a quea mimishi jjashahuabaquijji pea'ai! Jamaya poanijo Jesosa quecua'yojji jama poani miya. Eyacuiñajjiya quea nee nee po mee caje'yo. Jamajjeya quea ja'a jjashahuabaqui ajjaa ja'a Jesosaja bobi ij{jiañ}aji, ojaya ena canecojo nequi pea'ai a'a ishiji! Quea

ja'a ba'yaniya ¡quea bihui nee Jesosaja bobi ijji-acue, ojaya ena ishicue pea'ai!

²⁸ Jamajjeya Jesosaja bobi ijjiia jjimahuajo, ¡ojaya ena ishi jjimahuajo pea'ai jjashahuaba neineiquicue jama ba'a: —¿A'a eya e'e jojo nei Jesosa Quito nijje jjapeequiani quea ja'a nee? —jjashahuabaquicue!

¡Majoya pahui ijjiacue, e'ishijji ishicue quea bihui nee pea'ai! ²⁹ Jesosa Quitoja esohui ojaya bobijo miquea quea quehuajo ¡a'a ijjiajji! Jesosa mijo mano'yonajejo jjashahuabaqui jjimaa ¡a'a oja bobi ijjiajji! Miya ijjiajo Eyacuiñajji quea quene nee nee po chana!. Miya quea nee po mee caje. ³⁰ Quea huiso miquiana nijje nequiya Jesosajo jjashahuabaqui jjima oja bobi ijjiia cani. Jamajjeya quea mano poani, beca cuana ca'a'ama poani. Jamajjeya beca cuana mano'yonaje pea'ai. ³¹ Miquea eba'ejjiyo jjashahuabaqui majje ¡mimicue Eyacuiñajji nijje jama ba'a: —¡Ecuea mimishi cuana cuijea'yocue! —jamaya acue!

Jamajjeya Eyacuiñajjiya miquea mimishi cuijea'yo majje miya etecueajji pojjeama Jesosaja bobi ijjiañajo. ³² Jamatii Eyacuiñajjiya jjeya Jesosaja epeeiji quea ja'a pishana quea mano, quea nee po mee cani ejjabahuejjaqui meeiji, mimishi cuana epajea mee'yojji. Jamajjeya quijje Jesosaja epeeiji pojjeama cuana nijje equiyo'yojji pojjeama cuaquijo eshahuaja epeeiji cuana nijje.

³³ Jamajjeya epeeiji cuana, ¡shajja'ajjacue mo! ¡Miquianaaya Jesosaja bobi ijjiañajo ojee oe ijjiacue o shahuaba'yojji! ¡A'a mee nei ijjiia'ijjiajji; ishoa socue cuana! ³⁴ Ojjaña joya quea naba taja, quea shoe pea'ai poani equijo ca ijjiia'ijjiyahua Jesosaja

bobi ijzia jjimahuajo. Jamajjeya Eyacuiñajji quea tecue po ajja miquiana nijje, quea pame nee ojee Jesosaja bobo ijziañajo.

Miquea esohui etehue'yojo, quea huiso eya miquiaaya huohui'ajjanaje. Maya eyaya huohuije miquiana huasijje poe o'oya majje.

12

Edojjoshahua Pameya eseya Eyacuiñajji chaco meesahua cani

¹ Ecuea epeeiji, miquianajaya esohui etehue'yojo eya huohui'ajjanaje miquiaaya Edojjoshahua Pamejo. Jjeya nei eyaya maya huohuije miquianajaya ebajji. Edojjoshahua Pameya eseya Eyacuiñajji chaco meesahua cani. Oijaña Eyacuiñajji ejjashahuabaquijji jayojja jama ameesahua cani. ² Yahuajo Jesosa Quito nijje jjapeequi jjimahua miquianaya jjapeequinaje eshahua cuana nijje. Eyacuiñajji nisho nijje miminaje, acui ejehui'yo nijje pea'ai. Maya shajjama', nabama' pea'ai. Jamaya miquianajaya eba. ³ Beca cuana jama siajje pome poani ba'a: —Jesosa siajjepoji. Oya Eyacuiñajji Bacua Ejja pojjeama —jama siajje pomeya poani.

Jamajjeya miquianajaya eba oya cuana Edojjoshahua Pame nijje jjapeequi ajja. Onije jjapeequianijo ca ca Edojjoshahua Pameya oeyaya eseya huohui meesahua cani jama ba'a: —Esejaya Emeshi Mese nei oe nei nequi, Jesosa Quito — e'e, jamaya Edojjoshahua Pameya oeyaya eseya huohui meesahua cani.

⁴ Edojjoshahua Pame oe neiya eseya amee cani Eyacuiñajji quea pame nee. Oe epeeiji oe

aquiana quea pame nee Eyacuiñajijo ameesahua cani. Beca cuana pea aquiana quea pame nee ameesahua cani. Quea huiso aquiana cuana Eyacuiñajija ameesahua cani Edojjoshahua Pameya. ⁵ Esejaya Emeshi Mese oe nei yani. Ojaya nei yajjijo eseyaya chacoaña. Ohuaya ojaya epeejji cuana huoojea cani quea huiso ojaya yajjijo quea pame a'yohua. Ojaya yajjijo ohuaya chaco meesahua cani ojjaña echaco. ⁶ Eyacuiñajji oe nei yani. Ohuaya Jesosaja epeejji cuana huoojea cani ojaya echacojjji cuana a'yohua. Oe epeejji oe echacojjji ameesahua cani, Eyacuiñajjiya. Pea epeejji pea echacojjji ameesahua cani. ⁷ Edojjoshahua Pameya Jesosaja epeejji cuana quea pame ameesahua cani pea'ai. Jamajjeya ojjaña ba mee caje oya ese nijje nequi. E'e, ohuaya Jesosaja epeejji cuana quea ja'a ameesahua cani ojjaña Jesosa nijje ejjapeequi meesahuajji. ⁸ E'e, Edojjoshahua Pameya Jesosaja epeejji beca cuana quea jjashahuabaqui ja'a po mee cani Eyacuiñajija ejjashahuabaquijji e'e jojo nei ehuohuijji. Pea epeejjiya Eyacuiñajija esohui jayojja jama onaya ba meesahua cani quea ja'a nee. ⁹ Pea epeejji cuaa Jesosaja epeejji cuana quea ja'a, mete'ama pea'ai po mee cani. Beca epeejji cuana emanojaa cuana huaquia meesahua cani Edojjoshahua Pameya. ¹⁰ Ohuaya pea epeejji cuana ma dejja ajjima acani ameesahua cani. Pea epeejji Eyacuiñajija esohui huohui meesahua cani quea ja'a nee, pea ba'e meeiji. Beca cuana ba meesahua cani ache cuana e'e jojo nei ojaya, Edojjoshahua Pameja huoojea'yo poani ebajji. Ache dejja eshahua nijje quehuajje jjapeequiani

ba meesahua cani pea'ai. Edojjoshahua Pameya beca cuana Eyacuiñajija emimi mimi meesahua cani. Pea cuana ma emimi huohui meesahua cani ojjaña cuanaja ebajji. ¹¹ E'e, Edojjoshahua Pameya ojjaña Jesosaja epeejji jamaya ameesahua cani quea huiso. Ojaya ejjashahuabaquijiji ojaya epeejji cuana huoojea cani, Edojjoshahua Pameya.

Esejaya Emeshi Mese oe nei yani; ojaya epeejji cuana oja yami jayojja jama poani

¹² Ecuea eyami oe nei yani. Yaa cuana yani, equise cuana pea'ai yani. Quea huiso pea aquiana cuana yani ecue eyamijo. Jamatii ecuea eyami oe nei. Oya jayojjaya Jesosaja epeejji cuana poani, quea huiso ojee onijje jjapeequianijo. Jamatii ojjaña oe eyami jayojja jama poani; Jesosa Quitoja eyami jayojja jama eseja poani. ¹³ Jamaya poanaje ojjaña eseja ojaya epeejji cuana poanijo. E'e, Jodio cuana, Jodio pojjeama cuana ojaya epeejji poani. Sosema' chacochoacoani cuana, echaco mesema' pea'ai ojaya epeejji poani. Jamajjeya Edojjoshahua Pameya eseja Jesosa Quitoja eyami jayojja jama po mee canaje ojjaña, onijje jjapeequianijo. Edojjoshahua Pameya esejo nequiya Jesosaja epeejji quea ja'a po mee cani.

¹⁴ E'e, esejaya eyami oe nei yani. Jamatii yaa yani, equise yani, ecojja yani, quea huiso pea aquiana yani esejaya yamijo pea'ai. ¹⁵ Ejiojji eme' jayojja jama pojjeama. Jamatii ejiojji quea pame nee. A'a ejiojji jama poaje pojja'a ba'a: —Eya eme'

jayojja pojjeamajo eyamijo enequijji pojjeama –
¿a'a jamaya mimi majje enequijji pojjeama? Chojja, jamaya po majje oya jamatii eyamijo nequi, de.

¹⁶ E'e, eshajja ecojja jayojja jama pojjeama. Jamatii eshajja pea'ai quea pame nee, esapajo nequi pea'ai. Eshajja jama mimijajime epojji pojjeama ba'a: —Eya ecojja jjemo eyamijo nequime —jamaya mimijaji ajja, jamatii jamaya po majje eyamijo nequime, de.

¹⁷ E'e, ecuea eyami ecojja oopana pojjeama. Chojja. Eshajja yani pea'ai ejjashajja'ajjaquijji. Ecuea eyami eshajja oopana pojjeama. Yani ehui pea'ai ejjashiye'ajjaquijji. ¹⁸ E'e, Eyacuiñajjiya ecuea eyami pana ca poa. Ohuaya sa cani jayojja jama aca poa. Jamajjeya ecojja cuana, eshajja cuana, ehui cuana, quea huiso pea aquiana pea'ai pana ca poa, ohuaya. ¹⁹ Jamaya epana jojjemo eya ese ejja pojjeama pome. E'e, Eyacuiñajjiya ecuea eyami ecojja oopana ajiima poa. Eya ecojja oopana e'a jojjemo eya ese ejja jayojja jama pojjeama pome. Jamajjeya ohuaya ecue eyamijo quea huiso aquiana pana canaje, jjashajja'ajjaquijji po mee canaje, jjashiye'ajjaquijji po mee canaje pea'ai. ²⁰ E'e jojo nei ecuea eyamijo yani quea huiso aquiana. Jamatii ecuea eyami oe nei jayojja jama poani. Oya jayojjaya Jesosaja epeejji quea huiso nee yani. Jamatii ojee onijje jjapeequianijo eseaya oe jayojja jama poani, Jesosaja eyami jayojja jama poani.

²¹ Ecuea ecojja eme' cajaa a'ajja poani. Esapaa ejiojji cajaa ajiima acani pea'ai. Chojja ojjaña ojee quea pame nee nee poani. ²² Eyami dojjojo ca'a'ama. Jamatii eyami dojjojo cuana chama'

jojjemo eyami eshe pojjeama pome. ²³ Beca eyami dojjojo e'e pojja'a hua'ama. Jamatii eseyaya eyami dojjojo anijo nahue neineiaña. Pea aquiana eyamijo anijo eseyaya daqui huoshoaña bicho'ama epoji. ²⁴ Jamatii pea eyamijo esapajo, emejo bicho'amajo daqui mi huoshoaña. Eyacuiñajji ca bicho'ama eseja eyamijo. Ojjaña aquiana eyamijo oja pana. Ojjaña eyami ojee nequia canaje oe eyamijo. Jiquio ecua eseyaya esejaya eyami nahueaña ojjaña eyami, jamatii beca cuanajo se quea bicho poani jama jayojja ¡Jesosaja epeejiya pea epeeji jjapeequi meesahuacue onijje quea pame nee! ²⁵ Ojjaña aquiana eyamijo ani oe eyami poani, ojee acani quea pame nee. Oe eyami pea eyamiya nahue cani. Jamajjeya eyami quea pame nee poani. ¡Ma jayojja jama eseyaya Jesosaja epeeji ojee ejjachacoqui onijje! ²⁶ E'e, oe mijijke eyami quea nee poanijo, pea mijijke quea mano poaje pea'ai. Ojjaña mijijke eyami cuana quea aja poanijo, quea pame nee poaje ojjaña. Oya jayojjaya eseya Jesosaja epeeji oe eyami jayojjaya poani. Jamajjeya oe epeeji quea nee poanijo, ojjaña quea yeno poani ojo. Oe epeejiya quea pame nee nee acanijo, ojjaña onijje quea bihui nee poani.

²⁷ Jamajjeya ojaya ejjashahuabaquijji jama Eyacuiñajjiya esejaya eyami cuana pana ca poa quea huiso peapea cuana eyami. Oya jayojjaya Jesosaja epeeji cuana ojaya eyami quea huiso cuana jayojja jama poani. ²⁸ Jamajjeya Eyacuiñajjiya eseya Jesosaja epeeji cuana quea huiso peapea jjashahuabaqui'yome asahua cani ojaya epeeji cuana quea ja'a epoji. E'e, ohuaya beca epeeji

huohui canaje jama ba'a: —Miya ecuea ehuoojea-coo Jesosa Quitojo huohuiya.

Ohuaya pea cuana huohui canaje jama ba'a: —¡Ojjaña cuiñajji yasijje esohui quea pame nee Jesosa Quitojo huohuiquicue quea ja'a nee ojjañaja esha-jja'ajjiji!

Pea cuana huohui canaje jama ba'a: —¡Jesosa Quitoja epiejji cuana esohui huohuijji pocue!

Pea cuana ma dejjaajjima acani ameesahua canaje. Pea cuana emanojaa cuana huaquia meesahua canaje pea'ai. Pea epiejji cuana ona quea pame ba'e meesahuajji po mee canaje. Pea epiejji emeshi mese jayojja jama ojjaña jaahuanajji po mee cani. Pea cuana Eyacuiñajjiya pea emimi mimi meesahua cani. ²⁹ ¿A'a ojjaña Jesosaja epiejji cuana Eyacuiñajjiya huoojea cani esohui quea pame Jesosajo huohui coohua? ¿A'a ojjaña epiejji cuaa Eyacuiñajjiya esohui quea huesha huohui cani? ¿A'a ojjaña ojaya epiejji cuana esohui huohuijji poani? ¿A'a ojjaña epiejji ma dejjaajjima acani ameesahua cani? Chojja. ³⁰ ¿A'a ojjaña epiejji cuaa emanojaa cuana huaquia mee cani? Chojja. ¿A'a ojjaña ojaya epiejji cuana Eyacuiñajjiya emimi mimi meesahua cani? Chojja. ¿A'a ojjaña epiejjiya ma emimi eseja esohuiyo huohui cani ojjañaja ebajji? Chojja. ³¹ E'e, Edojjoshahua Pameya eseya, Jesosaja epiejji cuana Eyacuiñajjiyo chaco meesahua cani. ¡Miquianaaya Eyacuiñajjiyo quea pame nee chaco neinei sa añajo quea pame nee oe acue, pea epiejji cuana quea ja'a nee eba'e meesahuajji! Jamatii eyaya miya huohuije e'e jojo nei joya ojjaña quea jea nee nee

acani Eyacuiñajjiya ba cani quea pame nee nee.
Jamajjeya ojjaña quea jea acue!

13

*Eyacuiñajjiya eseya ojjaña quea jea nee
ameesahua cani*

¹ E'e, ojjaña e'e jojo nei quea jea acue jama ba'a: E'e pojja'a ojjaña dejjaja emimi, esohuido-jojjija emimi quea pame nee pea'ai mimi majje jamatii pea epreeji ecuea quea jea nee pojjeama. Jamajjeya ecuea pea cuana Jesosa nijje ejjapeequi meesahuajji pojjeama. Eya mimiani emimijeajji, esho'iquiaa cuiaqueyajea cani jama quea shajjaquijjo epojji. ² Eyacuiñajjiya eya ojaya esohui quea huesha nee huohui meesahua cajje ojaya ejjashahuabaquijji ba meesahua cajje pea'ai, ojjaña ojaya esohui etehue'yo ba meesahua cajje pea'ai, ma dejjaaj ajjima acani ameesahua cajje pea'ai jamatii pea epreeji ecuea quea jea nee pojjeama. Jamajjeya eyaya pea cuana Jesosa nijje ejjapeequi meesahuajji pojjeama. Eyacuiñajjiya eya ba cani mimishi cuijea'yo jjima pea'ai. ³ Ojjaña ecuea aquiana cuana aema'cuana huasijje quiaje'yo pojja'a; Jesosa nijje jjapee nishoquianijo, e'e pojja'a pea cuaa eya iña caje ejeanobiajeajji. Jamatii pea cuana quea jea nee a'ajjajo eyaya oya cuana eba'e meesahua'yojji pojjeama Jesosa nijje. Eyacuiñajjiya eya ba cani mimishi cuijea'yo jjima pea'ai.

⁴ Pea cuana e'e jojo nei ecuea quea jea nee nee amajje oya cuana ecuea tecuea cuajiji pojjeama. Quea bei poaje. Pea cuanaja aquiana quea jea

yajji pojjeama. Ecuea ehuohuijji pojjeama jama ba'a: —Eya ca iña quea pame nee poani.

Pea jayojja po sa po ajja nei nei pea'ai ca iña.⁵ Pea cuana e'e jojo nei ecuea quea jea nee neejo ecuea eniñebajji pojjeama. Pea nijje emimijajiji pojjeama. Quea nahue pojjeama poani, equenequene cuajiji pojjeama pea'ai. Pea cuana e'e jojo nei ecuea quea jea neejo, eya onaa quea tai acajje, aquiana napa cajje pea'ai eya quea yeno po tiitii ajja: —Onaaya eya quea mimishi acajje eyaya oya quea mimishi a pea'aije'yo —jamaya a'a jjashahuabaquijji.

⁶ Eyacuiñajji ecuea quea jea nee poanijo ecuea onajaya mimishi cuana boti'ama poaje. Ona quea pame nee poanijo ca ca eya queabihui nee poaje pea'ai. ⁷ Pea cuana e'e jojo nei ecuea quea jea nee poanijo e napajji cuana nijje quea quene po ajja. Oe epeejji pea epeejji jo siajje poanijo, ecuea esha-jja'ajjajji pojjeama. Jesosa nijje jjapee tiitiiquije'yo jamatii quea camaja poanijo. Jjashahuaba tiiti-iquije'yo jama ba'a: —E'e jojo nei Jesosaja epeejji poanijo, ohuaya eya ba'e tiitii mee caje'yo onijje eyajo.

⁸ Eyaya pea cuana quea jea nee atiitiije'yo. Jamaya sa poani Eyacuiñajji. Jjeya ca ca Eyacuiñajjiya ojaya epeejji cuana esohui quea pame huohui meesahua cani. Jamatii eyajo huohui pajeaje'yo. Jjeya beca cuana Eyacuiñajji emimi mimi cani. Jamatii eyajo ma emimi mimi pa-jea caje'yo. Jjeya Eyacuiñajjiya ejjashahuabaquijji ba meesahua cani oe pojji. Quijje eyajo oj-jaña ba mee caje'yo quea huiso. ⁹ Jjeya eseyaa Eyacuiñajjiya ejjashahuabaquijji oe pojji nei ba

mee cani. Jjeya Edojjoshahua Pameya eseya Eyacuiñajija ejjashahuabaquijji oe pojji nei huohui meesahua cani. ¹⁰ Jesosa Quito poe o'oyajo ca ca eseya ojjaña Eyacuiñajija ejjashahuabaquijji cuana quea pame nee nee ba mee caje'yo.

¹¹ Jama poaje ba'a: Eya esho'yahuajo oe pojji jjashahuabaquinaje quea pame pishana. Ecuea esohui cuana quea pame pishana poanaje pea'ai. Tii majje ca ca etii jama jjashahuabaquime poanaje, quea ja'a nee. Quea ja'a nee huohuinaje pea'ai. ¹² Oya jayojjaya jjeya eseyaya Quito ba jjima aña ecojjaa. Jamajjeya ojjaña ojaya ejjashahuabaquijji ba mee jjima acani. Quijje poe o'oya majje ese cojja neijo nequi oya mimije'yo. Jjeya ohuaya ojjaña esejaya ejjashahuabaquijji ba neinei cani. O poe o'oyajo eseyaya ojaya ejjashahuabaquijji ba neineije'yo pea'ai quea ja'a nee. Oya eseyaya ba neineije'yo pea'ai.

¹³ E'e, Jesosa Quito poe o'oyajo, eseya onijje jjapee tiitiiquije'yo. Ojaya epoe'yojjijo eseya jja'ishoa'ajjaquiani. Jjeya esejaya ojaya epeejji cuana quea jea nee poani. E'e, Jesosa Quitoja epoe'yojjijo jja'ishoa'ajjaquiani, onijje jjapeequiani pea'ai. Ojaya epeejji cuana quea jea nee atiitiiaña pea'ai. Jamaya Eyacuiñajji sa poani.

14

Edojjoshahua Pameya eseya chaco meesahua cani Jesosa nijke

¹ Jamajjeya ijjashahuaba tiitiiquicue pea cuana quea jea nee e'ajji! Jamaya mimicue ba'a: — Eyacuiñajji, ¡Edojjoshahua Pame huoojeacue e que

mi jayojja ameesahuaa, Jesosaja epeejji cuana quea ja'a nee onijje ejjapeequi meesahuajji! E'e, imiquea ejjashahuabaquijji huohui meesahuacue ojjaña meshi yasijke!

² Ojjaña joya Eyacuiñajjija emimijo mimiani onajaya ba jjima esohuijo Eyacuiñajji nijje mimiani, pea cuana nijje pojjeama. Edojjoshahua Pameya maya mimi meesahua cani. Jamatii pea cuanaja maya emimi quea quehua. Eyacuiñajjija ohuaye nei shajja'ajja cani. ³ Eyacuiñajjija esohui cuana quea ja'a nee huohui canijo ca ca Jesosaja epeejji cuaa quea ja'a shajja'ajja cani. Onijje jjapee neineiqui meesahua cani. Quea bihui nee po meesahua cani pea'ai. ⁴ Ojjaña joya Eyacuiñajjija emimijo mimiani onijje nei mimiani. Oya oe nei quea bihui nee poaje. Joya Eyacuiñajjija esohui quea ja'a nee huohuijji poaniya ca ca quea huiso Jesosaja epeejji cuana quea bihui nee po mee caje.

⁵ Eya miquianajo jjashahuabaquiani jama ba'a: Ojjaña miquianaya Eyacuiñajjija emimijo mimiani-ijo jamaya quea pame pishana poaje. Eya quea bihui pishana poaje. Miquianaaya Eyacuiñajjija esohui joya ojjañaja eba esohuijo huohuañajo ca ca jamaya quea pame nee nee, eya quea bihui nee nee poaje. E'e, Eyacuiñajjija esohui quea ja'a nee huohui majje pea cuana Jesosa nijje jjapeequi meesahuajja. Eyacuiñajjija pea emimijo mimi majje aje oe pea cuana Jesosa nijje ejjapeequi meesahuajji pojjeama. Pea epeejjiya Eyacuiñajjija pea emimi, ma ojjañaja quea quehua shajja'ajja majje cahuohui cahua esejaya esohuijo. Jamaya ohuaya huohui majje ojjaña Jesosaja epeejji cuana

quea pame nee jjapeequi meesahua caje Jesosa nijje.

⁶ Jamajjeya epeejji cuana, eya miquiana que poe majje mimi ajja pea emimijo joya miquianajaya bajjima esohuijo. Chojja, maya emimi shajja'ajja majje miquianaya Jesosa nijje ejjapeequijji pojjeama. Quea ja'a nee ca ca eyaya Eyacuiñajjija ejjashahuabaquijji miquianaya ba meesahuaje. Ojaya esohui eyacua Jesosaja ba meesahuaje pea'ai.

⁷ Jjiquio esohuijo jjashahuabaquicue pea'ai! Dejja cuanaja ba jjima pishanajo dehue quea ja'a nee miamia ajja. E'iñaqueyajji bajea jjimajo quea ja'a iñaqueyaqueya ajja pea'ai. Jamatii quea shajjaquijjo poaje, quea quehua. Jamajjeya ojjañaja eshajja'ajjajji pojjeama. ⁸ Echacomeejjiya eshe'ana mia jjimajo, echacoji cuana poqui ajja chachua. ⁹ Oya jayojjaya miquianaya pea emimijo joya onajaya quea quehuajo mimianijo, miquea esohui onajaya eshajja'ajjajji pojjeama. Jamajjeya jesohui joya onaja quea ja'a neejo huohuicue ojjañaja ebajji! ¹⁰ E'e, dejja cuana quea huiso meshi cuanajo ba'yani. Quea huiso emimijo mimiani pea'ai. Jamatii ojjaña emimi ojjaña meshijo quea ja'a nee poani, ma meshijo ba'eja quea ja'a. Jamajjeya ojjañaja emimi onijje ba'e cuanaja quea ja'a nee. ¹¹ Jamatii oe dejja pea emimijo joya ecuea quea quehuajo mimianijo oya pea dejja, eya ojaya pea poani pea'ai. ¹² Jamajjeya miquianaya Edojjoshahua Pame nijje quea pame nee a sa poanijo Edojjoshahua Pame nijje mimicue jama ba'a: — ¡Eya ameesahuacue quea pame nee, quea ja'a nee! Jamajjeya eya quea huiso Jesosaja epeejji cuana

onijje jjapeequi meesahuaje. E'e, ¡quea ja'a nee
nee Eyacuiñajjija esohui huohui meesahuacue mo!

¹³ Jamajoya Jesosaja epreejji Eyacuiñajjija
emimijo joya pea cuanaja quea quehuajo mimi
majje oya Eyacuiñajji nijje camimiahua jama
ba'a: —Ecue Chii, ¡joya o miminaje mo huohui
meesahua'yocue pea epreejji cuanaja quea ja'a
nee epojji! ¡Maya esohui mo huohui meesahuacue
quea ja'a nee onajaya ebajji! —jamaya mimicue
Eyacuiñajji nijje.

¹⁴ E'e, Eyacuiñajjija pea emimijo ma ecuea ba
jjimajo onijje mimi mee cajje jamatii ma e mim-
inaje ecuea quea quehua poani pea'ai. Edoo-
jjoshahua Pameya eya mimi meesahua cani ecuea
ejjashahuabaquijji pojjeama. ¹⁵ Jamajjeya eya
jama poaje ba'a: Ecuea ejjashahuabaquijji quea
ja'a nee jayojja eya mimije Eyacuiñajji nijje ecuea
esohuijo; pea emimijo joya ecuea ba jjima esohuijo
pea'ai eya onijje mimije pea'ai. Edoo-
jjoshahua Pameya eya sohuicuaya meesahua cani
pea emimijo joya ecuea ba jjima esohuijo, ecuea
edojjoshahua Jesosajo sohuicuayani; ecuea ej-
jashahuabaquijji quea ja'a nee jayojja jama eya
sohuicuayani ecuea esohuijo pea'ai. ¹⁶ Miquiaaya
pea emimijo Eyacuiñajji bihuiañjo, pea epreejji
minijje Eyacuiñajji ebihuiajji pojjeama. Ojaya ba
jjima miquea esohui. ¹⁷ E'e, miyaya Eyacuiñajji
bihuiaña quea pame nee. Jamatii miquea emimi
onajaya quea quehua. Jamajjeya miyaya Jesosaja
epreejji cuana onijje jjapeequi sahua jjima aje.

¹⁸ Miquianaya oe pojji mimiani Eyacuiñajjija pea
emimijo. Eyacuiñajjija eya ojaya pea emimijo
mimi meesahua canaje quea huiso. Jamajjeya eya

onijje mimiani jama ba'a: —Jamaya Eyacuiñajji, miyaya eya quea pame nee anaje.

¹⁹ Jamatii Jesosaja epeejji cuana ojee nequianii Eyacuiñajji esohui shajja'ajjajji, eyaya quea ja'a nee huohui sa aña joya onaja ojjañaja eba esohuijo. Esohui quea ja'a nee, quehua'ama mimianijo, ojjañaa shajja'ajja caje quea ja'a nee. Jamaya quea pame nee nee. Huohui sa po ajja quea huiso esohui pea emimijo, joya onajaya ba jjima esohuijo. Jamaya quea pame pishana.

²⁰ Ecuea epeejji cuana, ¡quea sho'i tai jayojja jama a'a jjashahuabaquijji! ¡Quea ja'a nee jjashahuabaquicue! ¡Jesosa Quitoja esohui ba neineicue! ¡A'a quea mimishi ba'ejji pea'ai!

²¹ Eyacuiñajjiya esohui yahuajo nei tehue mee ca poa jama ba'a:

“Pea cuana pea meshijo ba'e, ma pea esohuijo mimiani pea'ai eyaya huoojeaje Jodio cuana jjabahuejjaqui meeya. Jamatii oya cuana aje oe o shajja'ajja sa po ajja poaje”.

Jamaya Eyacuiñajjiya esohui poa.

²² Jamajjeya Jesosa Quitoja epeejji etiiya Eyacuiñajjiya pea emimi shajja'ajja majje ba caje Eyacuiñajji e'e jojo nei ona nijje nequi. ¡Jesosaja epeejji pojjeama cuana ca oe Eyacuiñajjiya esohui huohuicue; joya o mimiani esohuijoya oe huohuicue! Esohui shajja'ajja majje oya cuana jjapeequije'yo Jesosa nijje. ²³ Jamajjeya Jesosaja epeejji cuana ojee nequianijo, e'e pojja'a ojjaña miquianaya Eyacuiñajjiya pea emimijo mimijke. Jesosaja epeejji pojjeama cuaa, ojaya epeejji eyacua pea'aiya ma emimi shajja'ajja majje ¿ae shai oya cuana jjashahuabaquije? Miquianaya onajaya

ba jjima esohuijo mimiani shajja'ajja majje jama acaje ba'a: —¡Dee! Jesosaja epeeiji cuana niñe poqui'yonaje. Jamajjeya quea quehua mimiani —acaje.

²⁴ Jesosaja epeeiji cuaa ojee nequi majje Eyacuiñajjija esohui quea ja'a nee huohui canijo ca ca, pea cuana shajja'ajja majje ojaya mimishi cuanajo quea yeno poaje. E'e, Jesosaja epeeiji pojjeama cuana, ojaya epeeiji eyacua cuana pojja'a Eyacuiñajjija esohui shajja'ajja majje quea mete poaje jama ba'a: —Eyacuiñajjiya eya quea nee nee po mee caje'yo, de, ecuea mimishijo.

²⁵ Eyacuiñajjija esohui huohuijjiya ma dejja cuanaja ejjashahuabaquijji tai huohui cajo, shajja'ajja majje oya cuaa Eyacuiñajji bihuia caje ecui'oshajjajo nequiya. Jama poaje ba'a: —E'e jojo nei Eyacuiñajji miquiana nijje nequi —acaje cuaa. Jesosa nijje jjapeequije'yo pea'ai.

¡Jesosaja epeeiji ojee nequianijo Eyacuiñajjija esohui huohuicue quea ja'a nee!

²⁶ Jamajjeya ecuea epeeiji cuana, ¡bacue jiquio esohui! Miqianaya ojee nequi majje Eyacuiñajjija esohui huohuiya, jama acue ba'a: Oe epeeijiya Jesosa cabihuia cahua esohuicuayajjijo. Pea epeeijiya Eyacuiñajjija esohui cahuohui cahua. Peaa Eyacuiñajjija ejjashahuabaquijji pea cuana que cahuohui cahua. Majoya pea epeeiji Eyacuiñajjija pea emimijo mimi sa poanijo, peaa cahuohui cahua esejaya esohuijo. Jamajjeya ¡Jesosaja epeeiji ojee nequianijo quea ja'a nee acue! ¡Ojjaña Eyacuiñajji nijje jjapeequi meesahuacue! ²⁷ E'e pojja'a beca cuana Eyacuiñajjija pea emimijo mimi

sa poani. ¡Beca cuana, pea beca peejjima pojja'a mimi meecue, quea huiso pojjeama! Ma pea emimi mimianijo, ja'a ojee mimi meejjil! ¡Oe epeejji mimi pajea'yajo, pea mimi meecue! ¡Oya mimi pajea'yajo, pea mimi meecue! Ma epeejjji cuana Eyacuiñajjija pea emimijo mimi majje, pea cahuohui cahua esejaya esohuijo ojjañaja ebajji. ²⁸ Pea epeejjija ma emimi ba jjimajo, ja'a mimi meejjil Jesosaja epeejjji cuana ojee nequi yasi-jje! Oya oe nei nequi majje Eyacuiñajjija emimijo camimiahua Eyacuiñajji nijje.

²⁹ Miquiana ojee nequijo beca esohui huohuijjija, pea beca peejjima pojja'aa Eyacuiñajjija esohui quea ja'a nee cahuohui cahua, quea huiso pojjeama. Pea cuaa cashajja'ajja cahua. Shajja'ajja majje cajjashahuabaquiahua jama ba'a: —¿A'a e'e jojo nei Eyacuiñajjija esohui huohui canaje? — cajjashahuabaquiahua.

³⁰ Jamatii Edojjoshahua Pameya pea epeejjji jjashahuabaqui meesahua caje, oya pea'ai camimiahua ojjañaja eshajja'ajjajji. E'e, esohui huohuijjija huohui pajea cajo, ma epeejjija Eyacuiñajjija ejjashahuabaquijji cahuohui cahua. ³¹ Jamaya miquianaaya Eyacuiñajjija ejjashahuabaquijji ba majje huohuije ojjañaa. ¡Pea acaje jja a'a huohuijji! ¡Oe epeejjija huohui pajea cajo, pea epeejjija cahuohui cahua! Jamajjeya Jesosaja epeejjji cuana ba mee caje quea huiso Eyacuiñajjija esohui. Quea bihui nee poaje pea'ai. ³² Jesosaja esohui huohui sa poanijo ¡ca'ishoa cahua! ¡Pea mimi pajea'yajo cahuohui cahua! ³³ E'e, Eyacuiñajjija equijo ojaya epeejjji cuaa ja'a becajje huohuijji! Quea shajjaquijjo

poaje. Eyacuiñajjiya ojaya epeejji cuana ojee shajja'ajja mee cani quea bei. ¡Bacue! Ojjaña Eyacuiñajjiya equi cuanajo Jesosaja epeejji ojee nequi majje quea ja'a nee esohui huohui cani; becasje pojjeama huohui cani.

³⁴ Epona cuana, ojjaña Eyacuiñajjiya equijo ojee nequianijo, ja'a mimiji Eyacuiñajjiya esohui huohuijjji mimianijo! ijashajja'ajjaquicue oe! Jodio cuanaja esohui etehue'yo yahuajo jama poa pea'ai ba'a:

“¡Eyacuiñajjiya equijo epona cuana cajjasha-jja'ajjaquiahua! Eyacuiñajjiya epeejji cuana huoojeajji pojjeama oya cuana”.

Jamaya poa yahuajo. ³⁵ Esohui shajja'ajja majje e'e poja'a epona cuana huohui'ajja sa poani ma esohuijo. Jamatii ¡Eyacuiñajjiya equijo a'a huohui'ajjajji! Jamaya quea pame pojjeama. Ojaya equi yasijke poqui majje ojaya yahue cahuhu'i'ajja cahua, eponaa.

³⁶ Ecuea epeejji cuana Conitojo ba'e, miquianajaya eba Eyacuiñajjiya esohui miquiana que poe coo jjima. Chojja. Pea cuaa ojaya esohui shajja'ajja canaje miquianaja shajja'ajja jjimahuajo. Jamajjeya išhajja'ajjacue mo!

³⁷ Miquianaya beca cuana jama poani ba'a: — Eya Eyacuiñajjiya esohui huohuijjji e'e jojo nei poani. Eya Edojoshahua Pameya quea pame nee ameesahua caje'yo Eyacuiñajjiyo. Jamajjeya iñmiquianaya jjabahuejjaquicue ecuea esohui Eyacuiñajjiya esohui e'e nei poani! ³⁸ Ojjaña joya miquiana nijje nequi ecuea esohui shajja'ajja sa po ajja, ja'a oya cuana shajja'ajjajji!

³⁹ Ecuea epeeiji cuana, jamajjeya ¡Eyacuiñajjija esohui huohui neineicue! Pea epeeiji Eyacuiñajjija pea emimijo mimi sa poanijo ¡oya camimiahua!
⁴⁰ Jamajjeya ¡Eyacuiñajjija equijo ojee nequi majje ojjañaa quea ja'a nee acue! ¡Ojjaña Jesosaja epeeiji cuana shajja'ajjacue quea ja'a nee pea'ai!

15

Jesosa Quito mano'yo majje shequi o'oyanaje

¹ Jjeyahua nei eya miquiana huasijke huohui sa o'oya poani esohui quea pame nee Jesosa Quitojo. Yahuajo pishana ma esohui shajja'ajja majje miquianaya onijje jjapeequi'yonaje quea ja'a nee. ² Ma esohui Jesosa Quitoja eyaya huohuinaje. Shajja'ajja majje miquianaya onijje jjapeequi'yonaje quea ja'a nee, cuaqui yasijke epoqui'yojji pojjeama. Jamatii Jesosa Quito nijje e'e jojo nei jjapeequi jjima ca mi ca oe cuaqui yasijke poquije'yo.

³ E'e, ma esohui quea pame nee Jesosa Quitojo shajja'ajja majje eyaya huohuinaje miquianajaya eshajja'ajjajji jama ba'a: Eyacuiñajjija esohui yahuajo etehue'yo jayojja jama e'e jojo nei Jesosa Quito eseja mimishi cuanajo mano'yonaje.

⁴ Jesosa Quito mano'yajo, ojaya epeeiji cuaa oya jjani ai yasijke huananobia ca'ya poa. Pea beca peejjima cahui po majje, Eyacuiñajjija oya, Jesosa Quito shequi mee ca o'oya poa. E'e, Eyacuiñajjija esohui yahuajo nei etehue'yo jayojja jama aca poa Jesosaa. ⁵ Eshe o'oya poajo, Penohua oya ba canaje. Majoya ome miji pea'ai pea becaa, 12 huisomeya ojaya pea epeeiji cuaa Jesosa Quito

ba ca'yonaje, oja huoojea'yo cuaa. ⁶ Majoya qui-jje pishana quea huiso ojaya epreejji cuaa, 500 huisomeya ojee jjachichaqui majje Jesosa Quito ba canaje eshe o'oya. Quea huiso ma epreejji jjeya eshe enequi'yo. Beca cuana mano'yonaje.

⁷ Majoya pea pojajio Satiacohua Jesosa Quito ba canaje eshe o'oya. Majoya ojjaña oja huoojea'yo cuaa oya ba canaje eshe o'oya. ⁸ Majoya eyaya quijjeyejje neiya Jesosa Quito banaje pea'ai. E'e, yahuajo eya ojaya epreejji pojjeama poa. Jjeya ca ca eya ojaya epreejji po mee ca'yonaje pea'ai.

⁹ Jamajjeya eya quea pame pishana. Pea oja huoojea'yo cuana quea pame nee poani. E'e, o ba jjimahuajo eyaya ojaya epreejji cuana janobajjima nei napanaje. Jamatii Eyacuiñajjiya eya babaca canaje Jesosaja huoojea'yo epojji pea'ai. ¹⁰ Eya Eyacuiñajjiya quea jea nee nee poani. Jamajjeya ojaya esohui huohuijji po mee canaje, Jesosaja huoojea'yo po mee canaje pea'ai. Ohua huoojea cajje eyaya ojaya esohui huohui neinei'yonaje. Jesosaja pea ehuoojea'yo cuaa quea huiso pishana chaco canaje ojo. Eyaya ca ca ojo janobajjima nei chaco tiitiiaña ohuaya eya chaco meesahua canajejo. E'e, ohuaya eya chaco meesahua ajja jojjemo eyaya ojo chaco jjima ame. ¹¹ E'e pojja'a pea ehuoojea'yoja esohui Jesosa Quitojo miquianaaya shajja'ajjanaje. E'e pojja'a ecuea esohui ojo shajja'ajjanaje. Jamatii, ojjaña ecuaaya ma esohui quea pame Jesosa Quitojo huohuiña. ¡Shajja'ajja majje miquianaaya ojaya esohui jayojja jama e'e jojo nei ba'ecue!

Jesosa Quitoja epreejji cuana quijje eshe o'oya

poaje

¹² E'e, miquiana huasijje ecuaaya huohuinaje jama ba'a: —Jesosa Quito mano'yajo, Eyacuiñajjiya oya shequi mee ca o'oyanaje.

Jamajjeya ¿apiojji acuae jja oe miquianaya beca cuana jjeya siajje poani? Jama ba'a: —Eseyo mano'yajo quijje eshequi mee'yojji pojjeama —¿apiojji jamaya siajje poani?

Chojja. Shequi mee caje o'oya eseya. ¹³ ¡Bacue, oe! Mano'yo majje eshe o'oya po meemee ajja jojjemo Jesosa Quito mano'yo majje shequi mee o'oya jjima acaquaiaye pea'ai. Chojja. Oya shequi mee ca'ya poa, Eyacuiñajjiya. ¹⁴ Oya eshe o'oya pojjeama poa jojjemo ecuanaja esohui quea pame nee ojo e'e nei pojjeama pome. Oya mi shequi o'oya poa jojjemo miquianaya onijje jjapeequi jjima pome pea'ai. ¹⁵ Ecuaaya huohuiña jama ba'a: —Eyacuiñajjiya Jesosa Quito shequi mee ca'yonaje —jamaya e'e nei pojjeama jojjemo ecuana siajje ponequime. Chojja, de. ¡Shajja'ajjacue mo! Ma siajjepojji cuanaja esohui e'e nei poani jojjemo ca emano'yo cuana shequi'yo jjima pome, Jesosa Quito shequi'yo jjima poquiaypea'ai. Chojja, ecuea eba oya shequi'yonaje. ¹⁶ E'e, emano'yo cuana shequi'yo ajja jojjemo Jesosa Quito pea'ai shequi'yo jjima poquiaye. ¹⁷ Oya shequi o'oya jjima jojjemo miquianaaya siajjepojjiya esohui shajja'ajja'yome, Jesosa nijje jjapeequi jjima pome. E'e, Jesosa Quito shequi o'oya jjima poa jojjemo Eyacuiñajji quea quene nee tii pome, miquianajaya mimishi cuijea'yo jjima pea'ai pome. Chojja, ecuea eba Jesosa Quito shequi o'oyanaje. ¹⁸ Oya shequi o'oya jjima jojjemo

ojaya epeeiji yahuajo mano'yo cuana cuaqui yasi-jje poqui'yoquiaye. Chojja, ecuea eba Jesosa Quito shequi o'oya poa. ¹⁹ E'e, eseya quea bihui nee onijje jjapeequi mee canaje jiquio meshijo ba'yanijo. Jamatii eseya eshe o'oya po mee ajja jojjemo eyajo onijje ba'e tiitii mee'yo jjima acame. Jamaya poani jojjemo ojjaña cuana esejo mimi'yome jama ba'a: —Pabohua ecuana siajje acanaje, de. “¡Jesosa Quito nijje jjapeequi'yocue!” siajje a'yome acanaje.

Chojja, ecuea eba eseya eshe o'oya po mee caje'yo. ²⁰ E'e jojo nei jamaya poanaje ba'a: Eyacuīñajjiya Jesosa Quito shequi mee ca o'oyanaje, eyami eyacua acoo ca'yonaje emano o'oyajji pojjeama. Jamajjeya esejaya eba ohuaya e'e jojo nei Jesosaja epeeiji cuana ojjaña tii shequi mee caje o'oya emano o'oyajji pojjeama. ²¹ E'e, Adana quea mimishi poa sosejje mano mee ca'ya poa. Jamajjeya ojjaña manoje'yo, ba'e tiitii ajja meshi cuanajo ba'eca. Jesosa Quitohua ca ca quea pame nee nee acanajejo, ojjaña eshe o'oya po mee caje'yo. ²² Ojjaña cuana Adanaja osecua cuana poanijo o jayojja quea mimishi poani. Jamajjeya Eyacuīñajji nijje ba'e meemee ajja eyajo. Jesosa Quito nijje jjapeequi majje ca ca ohuaya eseya ba'e tiitii mee caje'yo onijje eyajo eshe o'oya po mee'yo majje. ²³ ¿Ache ebionei shequi mee ca o'oyanaje? Eyacuīñajjiya Jesosa Quito ebionei shequi mee ca o'oyanaje. Quijje poe o'oya majje ohuaya ojaya epeeiji cuana shequi mee caje o'oya.

²⁴ E'e, quijje poe o'oya majje Jesosa Quito ojjañaja Emeshi Mese nei poaje'yo, ojjaña huoo-jea'yojji. Jamajjeya ohuaya ojjaña quea mimishi poani jeabichajea'yo majje iña caje'yo. Iña majje

shajja'ajja mee caje'yo. E'e, ohuaya Edosiquiana nei shajja'ajja mee caje'yo pea'ai. Ojjaña eshahua cuana pea'ai, ojjaña emeshi mese quea tai cuana pea'ai shajja'ajja mee caje'yo, Jesosa Quitohua. Jamaya amajje ohuaya ojjaña cuana ojjaña meshi cuanajo ba'e oja Chii bihuia mee caje'yo jama ba'a: —Eyacuiñaggi, miya quea ca'a nee nee ojjaña huoojea'yojji. ¡Ojjañaa miya cashajja'ajja cahua! —jamaya ojjaña amee caje Jesosaa.

²⁵ E'e, Eyacuiñajjiya Jesosa Quito ojjaña mimishi cuana, eshahua cuana pea'ai jeabichajea meesahua cani. Jeabichajea jeyojeyo majje oya, Quito Emeshi Mese oe nei nei poaje'yo; ojjaña huoojea'yojji nei poaje'yo. ²⁶ Yahuajo mimishi aca poa sosejje mano poquipoqui'yani. Quijjeyejje nei ese mano mee'yojji chama'yo tii a'yo majje ojjaña cuana eshe o'oya po mee caje'yo, Jesosa Quitohua. Mano'yo ajja tii tii po mee caje'yo. ²⁷ Yahuajo nei Eyacuiñajjiya esohui etehue'yojo jama poa ba'a: “Eyacuiñajjiya ojjaña jeabichajea'yo majje ojjaña huoojea'yojji po mee caje'yo oya”. Jamaya yahuajo Eyacuiñajjiya Jesosa Quitojo aca poa.

Jamatii Jesosa Quito Eyacuiñajji huoojea'yojji pojjeama. Ojjaña pea cuana huoojea'yojji ca ca Quito po mee caje'yo, Eyacuiñajjiya. ²⁸ E'e, Jesosa Quito ojjaña quea mimishi cuana jeabichajjea sahuamee caje Eyacuiñajjiya, oya ojjaña huoojea'yojji po mee caje'yo. Majoya oja Chii nijje Jesosa Quito mimije jama ba'a: —Ecue Chii, miya e huoojea'yojji poani tii tii —jamaya poaje oja Bacua Ejja Jesosa Quito.

E'e, Eyacuiñajji e'e nei ojjaña huoojea'yojji poaje'yo tii tii; eyajo nequi cuana, meshijo ani

cuana pea'ai huoojea'yojji poaje'yo tii tii.

²⁹ E'e jojo nei Eyacuiñajjiya eseya shequi mee caje o'oya. Jamatii beca cuana jama poani ba'a: —Emano'yo cuana eshequi mee o'oyajji pojjeama.

Beca epeejji cuana quea quehua jjashahuabiquiani jama ba'a: —Yahuajo Jesosaja epeejji mano'ya poa Eyacuiñajjiyo besa mee jjima. Jamajjeya emano'yoja yajjijo ojaya epeejji eshe nequi Eyacuiñajjiyo besa mee cani cuaa emano'yoja bajjanijo, emano'yo cuana cuaquijo equiyo'yojji pojjeamajo —jamaya beca cuaa acani. Oya cuana jjashahuabiquiani ojjaña cuana shequi mee caje o'oya. Jamajjeya jamaya acani.

³⁰ Eyacuiñajjiya eseya eshe o'oya epo mee'yojji pojjeama jojjemo ¿ajeo acuae ecuaaya ojjaña pojjaeo Jesosa Quitoja sohui huohuime? Ojaya esohui huohuiañajo pea cuaa ecuana quecua nei nei sa acani. ³¹ Epeejji cuana, e'e jojo nei Eyacuiñajjiya eseya shequi mee caje o'oya. Miquiana esejaya Emeshi Mese nei Jesosa Quitoja esohui shajjal'ajjanajejo, eya queabihui nee. Jamatii pea cuaa quecuapanan caniya tii eya Jesosa Quitojo chacochacoani queabihui nee. ³² E'e, eshahuaja epeejji cuaa ibia jama quea mase neeya Epesojo ba'eya eya beshahua nei mano mee ca'yonaje eya esohui ehuohui poajejje. Jesosa Quito eshe o'oya po ajja poa jojjemo ¿apiojji shai eyaya esohui huohui tiitiime so'o? Quea camaja nee poanaje. Dejja mimishi cuaa huohui cani jama ba'a: —Mecahuajje ecuana manoje'yo eshequi'yojji pojjeama. ¡Jamajjeya jjeyahua nei e'ijjia'ijjia, e'ishi'ishi pea'ai! —poani.

Jamatii eshe epo o'oyajji pojjeama jojjemo eseya jamaya po pea'aime. ³³ ¡A'a quea quehua jjashahuabaquijji! ¡A'a onaaya miya jjadasia mee-quijji! Pea cuana siajje poani jama ba'a: —Ecuana eshequi mee o'oyajji pojjeama.

¡Onijke a'a jjapeequijji! O jayojjaya mi po chana', quea mimishi. ³⁴ Jamajjeya ¡pajea'yocue ejjashahuabaquijji quea quehua! ¡Jesosaja esohui jayojja jama po o'oyacue! ¡Esohui quea quehuajo a'a jjashajja'ajjaquijji! Beca cuanaja Eyacuiñajjiya esohui e'e nei ba jjima. Eyaya miquianaya huohuaña quea bicho epoji.

¿Achajja shequi o'oyame acuae se poaje?

³⁵ E'e pojja'a miquianaaya eya huohui'ajjanaje jama ba'a: —¿Achajja shai Eyacuiñajjiya emano'yo cuana shequi mee caje o'oya? ¿Ache eyami shai esejaya poaje'yo? ¿A'a eyami eyacua?

³⁶ Miquianaya quea quehua jjashahuabaquianijo ¡bacue! Anoso quecua jjima tii ajja. Quejo quecua cajje meshijo pohua'yani. Siobijke pohua majje ejjii chama'yo poani, meshi pojji po'yani.

³⁷ Quejo quecua cani cuaa anoso, pea eso' pojja'a. Anoso sa' bana ca ajja. Chojja, eso' pohua majje esa' tiiye'yo. ³⁸ Eyacuiñajjiya eso' pohua mee'yo majje esa' tii mee cani. Jamajjeya anoso pohua majje anoso sa' tiiani. Pea same anoso, huene-huene sa' jayojja pojjeama. Jamaya Eyacuiñajjiya pana ca'ya poa.

³⁹ Oya jayojja eyami cuana: Oe eyami pea eyami jayojja pojjeama. Quea huiso peapea yamime yani. Ijjiacajji pea yamime, dejja jayojja jama pojjeama. Cuichojjiya eyami pea. Jai cuana pea

yamime, cuichojjija jama pojjeama. ⁴⁰ Oya jayojjaya eyajo Eyacuiñajjiya esohuidojojji cuana yani quea huiso nee. Oya cuana yamima', dejja cuana jama pojjeama. Esohuidojojji cuaa quea pame acani Eyacuiñajjiya yajjijo. Jamatii dejja acani jayojja jama pojjeama acani. Dejja cuanaja eyami quea bame pea'ai. Eseyaya quea pame aña Eyacuiñajjiya yajjijo pea'ai. ⁴¹ Oya jayojjaya eshequi epojjajo quea pame nee. Ba'i eshequi jayojja jama pojjeama. Jamatii ba'i quea pame nee pea'ai. Majameta ba'i jayojja jama pojjeama. Jamatii majameta quea pame nee pea'ai. Oe majameta pea majameta jayojja jama pojjeama. Oe quea jiji nee, pea quea jiji pishana. Jamatii ojjaña quea pame nee.

⁴² Jiquio ecua anoso quecua cajje Eyacuiñajjiya esa' pohua mee cani jayojja jama eseya mano'yajo, Eyacuiñajjiya eshe o'oya po mee caje'yo. E'e, mojea ca'yajje esejaya eyami ihuije'yo. Chama'yo tii poaje'yo. Eshe o'oya po mee ca'yajje ca ca emano'yojji pojjeama. Eyami eyacua poaje'yo, quea pame nee nee esejaya. ⁴³ E'e, esejaya eyami mojea ca'yajje ihuije'yo. Ca'a'ama. Eshe o'oya po mee majje ca ca quea pame nee po mee caje'yo, Eyacuiñajjiya. Pea eyami eyacua quea ca'a nee poaje'yo emano beca'yojji pojjeama tii. ⁴⁴ Jjeya meshijo ba'yanijo esejaya eyami ca'a'ama. Manoje'yo. Ojjaña cuana eseya jamatii ihuije'yo. Eshe o'oya po majje ca ca pea eyami poaje esejaya. Eyajo anicaja jayojja jama poaje'yo. E'e, jjeya esejaya eyami meshijo eba'ejji ca'a'ama. Jamajjeya e'e jojo nei quijje Eyacuiñajjiya esejaya pea eyami pana caje'yo

eyacua, quea ca'a nee eyajo eba'e tiitii'yojji.

⁴⁵ Eyacuiñajjiya esohui etehue'yo jama poa ba'a: "Eyacuiñajjiya ebionei dejja Adana bajjani pana ca'ya poa. Eshe po mee ca'ya poa". Jamaya yahuajo nei nei poa.

Adanaja eyami ca'a'ama poa. Quijje Jesosa Quitohua eseaya eshe o'oya po mee cajje esejaya eyami eyacua poaje'yo, pea eyami. Eyajo anicaja jayojja jama poaje'yo quea ca'a nee, ihui'yo ajja.

⁴⁶ Eyacuiñajjiya esejaya eyami ca'a'ama ebionei pana ca'ya poa meshijo eba'ejji. Quijje Jesosa Quitohua esejaya eyami eyacua pana caje'yo quea ca'a, quea pame nee pea'ai eyajo eba'e tiitii'yojji.

⁴⁷ Eyacuiñajjiya ebionei dejja Adana bajjanija eyami pana ca'ya poa meshi, meshijo eba'ejji. Shequi o'oya majje Jesosa Quitoja eyami eyacua poa, meshi pojjeama. Pea eyami ojaya, de, quea ca'a nee eyajo e'ani tiitii'yojji. ⁴⁸ Ojjaña cuana meshijo ba'e Adana jayojja. Eyami ca'a'ama. Meshi oopana. Jesosaja epeeiji cuana ca ca o jayojja jama poaje'yo quea pame nee, quea ca'a nee onijje eyajo eba'e tiitii'yojji. Eyami meshi pojjeama poaje.

⁴⁹ Jjeya meshijo ba'yanijo esejaya eyami ebionei dejjaja eyami jayojja poani, meshi oopana. Quijje eyajo ba'e majje eseaya Jesosa Quitoja eyami eyacua jayojjaya poaje'yo, meshi pojjeama.

⁵⁰ Epeeiji cuana, ¡shajja'ajjacue ecuea esohui! Ojjaña meshijo ba'eja eyami ca'a'ama, e'ihui'yojji, meshi pojji epo'yojji, Jesosa Quitoja eyami eyacua jayojja pojjeama. Ba'e meemee ajja eyajo Eyacuiñajjiya cuiñajjijo. E'e, jjeya esejaya eyami meshi, de, eshe epoji tiitii pojjeama eyajo. Quijje

ca ca eseya eyami eyacuajji ba'e tiitii mee caje'yo eyajo, Eyacuiñajji ojjaña huoojea'yojji poanijo.

⁵¹ ijjeya shajja'ajjacue pea esohui! Yahuajo eseya jiquio esohui ba mee jjima, eyacula, jama ba'a: Beca cuana mano'yo ajja nei nei Jesosa poe o'oya jjimahuajo. Ojjaña joya eshe nequi Jesosa Quito poe o'oyajo, emano'yojji pojjeama; onajaya eyami e'ihui'yojji pojjeama. Jesosa Quitohua ojaya epeejji cuanaja pea eyami panacuaji caje'yo eyacula. ⁵² E'e, quijjeyejje nei eshe'ana ai mia cajo, Jesosa Quitohua ojaya epeejji eshe nequi cuanaja pea eyami eyacula pana caje'yo. Jiquio ecua cojja capicapiani jayojja jama panacuaji'yomeya acaje. Eshe'ana mia cajo, ojjaña emano'yo cuana shequi mee caje'yo. Eyami eyacula panacuaji caje'yo eba'e tiitii'yojji. Mano o'oya ajja poaje'yo. E'e, ojjaña esejaya eyami eyacula poaje'yo. ⁵³ Jjeya esejaya eyami eba'e tiitiiji pojjeama. Ca'a'ama. Manoje'yo. Chama'yo tii poaje'yo. Jamajjeya poe'yo majje Jesosa Quitohua esejaya eyami eyacula pana caje'yo ese nequi tiitii mee'yojji, emano'yojji pojjeama tii tii. ⁵⁴ Jjeya jiquio meshijo eseya Jesosa Quitoja epeejji cuana enequi tiitiiji pojjeama. Quijje ca ca ohuaya eseya nequi tiitii mee caje'yo eyajo. Jjeya meshijo ba'e eseya manoje'yo. Quijje ca ca esejaya eyami eyacula mano'yo ajja poaje'yo. Ba'e tiitiije'yo. E'e, Eyacuiñajjiya esohui yahuajo nei nei etehue'yo jayojja jama poaje. Yahuajo jama poa ba'a: "Dejja cuana mano'yo ajja tii tii. Eshe o'oya po tiitii mee caje'yo Eyacuiñajjiya". ⁵⁵ Jamaya tehue mee ca poa yahuajo nei nei pea'ai ba'a:

"Emano'yo cuana emojea'yo jaa tiitii ajja; eshe

o'oya po mee caje'yo tii tii. Quijje mano'yo
ajja nei nei poaje'yo".

Jamaya yahuajo nei nei tehue mee ca poa Ey-acuiñajjiya.

⁵⁶ Mimishi cuana po nequi jjejojo ojjaña cuana mano ca'yani. Jamajjeya ojjaña quea mete nee poani emano'yojjii. Moisesija esohui etehue'yojo eseyaya baña ojjaña shajjama' poani. Jamajjeya manoje'yo. ⁵⁷ Jjeya Eyacuiñajji ejjabihuaqui jama ba'a: —Eyacuiñajji, miya quea pame nee nee. Miyaya ecuanaja Emeshi Mese nei Jesosa Quito huoojeanaje ecuanaja mimishi cuijea'yohua. Jamajjeya ecuana shequi meeje o'oya. Ba'e tiitii meeje'yo eyajo.

⁵⁸ Jamajjeya ecuea epeejji cuana, ¡Jesosa Quitoja esohui etehue'yo jayojja jama atiitiicue! ¡Ojaya epeejji quea pame nee po tiitiicue! ¡A'a Jesosa nijje jjapeequi pajea'yojjii! ¡Emeshi Mese neijo Jesosajo chaco tiitiicue! Jjeya ojo chacochacoanijo, quijje ohuaya eseya quea huiso sosequia caje'yo eyajo.

16

¡Ejjeshejji chichacue Jesosaja epeejji aema' ba'e meesahuajji!

¹ Yahuajo pishana miquianajaya etehuejo eya huohui'ajjanaje bejjo Jesosaja epeejji huasijje, ma Jodea meshijo ba'e yasijje ehuoojeajji. Jjeya eyaya miquianaya saja'aje jama ba'a: Eyaya esohui tehuenaje Jesosaja epeejji cuana huasijje, Janata meshijo ba'e yasijje. ¡Ma esohui etehue'yo jayojja jama acue pea'ai miquianaaya! ² E'e, ¡bejjo chichacue! E'e, chacochacoajo miquianaya

sosequia cani cuaa ejjeshejjijo. Jamajjeya ojjaña epojja Eyacuiñajji ojee bihuiajjijo, nomico pojjajo, iejjeshejji chichacue Jesosaja epeejjii aema' huasi-jje ehuoojeajji, Jodea meshijo ba'e yasijje! E'e pojja'a oe epeejiya oe pojji chaco majje oe pojji quia caje. Pea epeejiya quea huiso quia caje pojja'a. Jamaya quea pame quiacue! Jamajjeya eya miquiana que poe jjimahuajo miquea ejjeshejji echicha'yo poaje. ³ ¿Ache dejja cuana pojja'a ejjeshejji echicha'yo dojo meeje'yo aema huasijje, Jenosanenajo ba'e yasijje? jjashahuabaquicueache dejja cuana quea pame nee ehuoojeajji! Jamajjeya miquiana huasijje poe majje eyaya ma dejja cuana huoojeaje ejjeshejji dojohua. Eyaya ecuea esohui etehue'yo huoojeaje onijke ojjaña esejaya epeeji cuana Jenosanenajo ba'eca ba meeiji ma dejja cuana ecue huoojea'yo ejjeshejji quiaa. ⁴ E'e pojja'a quijje jjashahuabaqui majje eya jama poaje ba'a: —E'e, eya pea'ai Jenosanena huasijje capo-quiahua. Jamaya quea pame nee —eya poaje. Jamajjeya ojee poquije.

⁵ Quijje eya Masenonia meshi yejjenanasa poani. Yejjenanama jje miquiana que poqui sa poani. ⁶ E'e pojja'a eya miquiana nijje nequije quea huiso cahui cuanajo; quea huoe poani ba'i pojja cuanajo eya miquiana nijje anije. Majoya eya ojjaña huapa cuana huasijje poquije o'oya. Miquianaaaya eya poqui meesahuaje. Aquiana epoqui meeiji quiaje pojja'a. ⁷ Jjeya ca ca eya miquiana que poe sa po ajja. E'e, jjeya miquiana nijje nequi meemee ajja quea huiso cahuijo. Jamajjeya quijje eya poeje miquiana baa. Poe majje miquiana nijje nequije quea cahui huiso. Jamaya

eya poaje esejaya Emeshi Mese neiya Jesosaa eya miquiana nijje nequi mee sa acanijo.⁸ Jjeya ca ca eya jjashahuabaquiani jiquiojo Epesojo enequijji. E'e, eya jiquiojo tii nequije. Jodio cuana ojjaña bobi que cuanajo nequi chicha majje, bobi apoa po majje pea'ai ojjaña quea bihui nee ojee ijji'ijjiaje. Maya eyaya ishoaña.⁹ E'e, jiquiojo eyaya quea huiso cuana Eyacuiñajjija esohui huohuaña. Quea huiso nee neeya shajja'ajja cani. Jamatii quea huiso eshahuaja epeejjiya eya Jesosa Quitojo mimi pajea mee'yo sa acani cuaa.

¹⁰ E'e pojja'a Timoteo miquiana que poeje'yo. ¡Poe'yajo oya jaahuanacue, quea bihui nee po meecue! Oya e jayojja jama poani; esejaya Emeshi Mese nei Jesosajo chaco cani. ¹¹ Oya etii pishana. ¡Jamatii ojjañaa miquianaaya oya shajja'ajjacue! ¡A'a ojo miamiajji! ¡Pea huasijke poqui meesahuacue quea bihui nee! Jamajjeya oya poeje o'oya e que. Eyaya oya ishoa'ajja anije Jesosaja pea epeejji cuana nijje.

¹² Yahuajo eya Jesosaja epeejji Apono bajjani nijje miminaje jama ba'a: —Apono, ¿ache shono acuae miya poquije Conito huasijke esejaya epeejji cuana baa? ¡Jesosaja pea epeejji cuana nijje oe poquicue jocuama! —eya poanaje.

Jjeya oya, Apono poqui sa po ajja quea huiso chacochacoanijo. Quijje apoa po majje oya poquije miquiana baa.

Pea esohui quepe nei Etepanajo

¹³ Ecuea epeejji cuana, ¡quea ja'a nee jjashahuabaqui tiitiicue! Peaa miya dasia ca chana!. ¡Jesosa nijje jjapeequianijo Eyacuiñajjija

esohui jayojja jama po tiitiicue quea pame nee! ¡A'a Jesosaja epeejji quea mete pojji! ¡Ojaya epeejji quea ca'a nee, quea pame nee pocue! ¹⁴ ¡Ojjaña quea jea nee acue! ¡Quea bei nee nee ba'ecue ona nijje!

¹⁵ ¡Epeejji cuana, shajja'ajjacue mo! Miquiana-jaya eba Jesosaja epeejji quea pame nee Etepana bajjani. Ojaya huapa pojjeama cuana miquiana-jaya eba pea'ai, Jesosaja ebionei epeejji cuana Acaya meshijo poanaje. Jesosaja pea epeejji cuana jaahuana tiitii cani quea pame nee, Etepanaa.

¹⁶ Jamajjeya ionije jjapeequicue! ¡Quea pame poanijo, oya shajja'ajjacue! ¡Pea cuaa Etepana jayojja jama quea pame nee Jesosajo chaco cani shajja'ajjacue pea'ai!

¹⁷ Ojjaña miquianaya poe ajja e baa, enijke jjapeequi'yohua. Jamatii miquianajaya epeejji cuana Etepana bajjani, Potonato pea'ai, Acaico pea'ai poeyanaje e chaco sahuua. Jamaya quea pame nee. ¹⁸ Miquiana queabihui nee po mee canaje jayojjaya jama ohuaya eya queabihui nee po mee cani. Quea pame nee poanijo, joya cuana cashajja'ajja cahua ojjañaa!

Esohui quijjeyejje nei tehue'yo

¹⁹ Jesosaja epeejji cuana Asia mishijo ba'e miquianajo jjashahuabaquiani. Jamajjeya eya huohui'ajja mee cani jama ba'a: —¿Achajja acuae nequiana ani so'o? —onajaya ebajji.

Jesosaja epeejji Aquinaa ojaya ehuanase Pisina nijjeya, ojjaña Jesosaja epeejji cuana Aquinaja equijo ojee dobiquiani Jesosaja esohui baa

pea'aiya miquiana huohui'ajja cani jama ba'a:
—¿Achajja acuae nequiana ani so'o?

²⁰ Ojjaña Jesosaja epeeji cuana jiquiojo ba'eya
miquianaya huohui'ajja cani jamaya pea'ai.

Ojjaña Jesosaja epeeji cuana esejaya quea jea
neejo, ¡quea bihui nee mimicue ojjaña cuana nijje!

²¹ Eya bajjani Pabo. Miquiana quea bihui nee
epoji eyaya eyaye neiya jiquio esohui tehueña
miquiana huasijke jama ba'a: ²² —¡Ojjaña joya
Emeshi Mese nei Jesosa Quito nijje e'e jojo nei
jjapeequi ajja Eyacuiñajjiya quea nee nee capo mee
cahua! ¡Esejaya Emeshi Mese nei Jesosa Quito
capoe o'oyahua jjeya nei!

²³ ¡Esejaya Emeshi Mese nei Jesosa Quitohua
miquianaya cajaahuana cahua quea pame nee!

²⁴ Eseya Jesosaja epeeji cuana poanijo
miquianaya ecuea quea jea nee nee poani,
ojjaña. Mahuiso. Eyaya, Pabohua jiquio esohui
tehuejeyonaje. Apoa.

**Eyacuiñajjija Esohui
New Testament in Ese Ejja (BL:ese:Ese Ejja)**

copyright © 2012 Wycliffe Bible Translators, Inc.

Language: Ese Ejja

Translation by: Wycliffe Bible Translators, Inc.

Ese Ejja [ese], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ese Ejja

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-23

PDF generated using Haiola and XeLaTeX on 21 Feb 2024 from source files
dated 29 Jan 2022

88838088-e20d-51ca-8c91-69194f5ae678